


# LESA KWIMWESHA AYE MWINE KUPICHILA MUBYUBILO BYANJI

 Amiwa najinga wakumya pa kumona mulunda nami, Joseph Boze, popa, kabiji Najikwaluluka ne kwikala na kimye kicheche kya kumwimuna mu kuboko kwanji.

<sup>2</sup> Twayai tuzhikule pano Kyambo kya Lesa, ku Bahebelu, kyapitala kyabu 1. Nakeba kutanga, kibaba, veeleshi wabu 1, wabu 2, ne wabu 3, pakuuba mba tufumyeko mutwe bufuku buno.

*Lesa, mu bimye byavula ne mu misango yavula waambile mu bimye bya kala ku bashakulu betu mu bangauzhi,*

*Pakuuba kuno ku mpelo ya ano moba witwambila atweba mu Mwananji, ao ye atonguele mba ekale nswanyi wa pa bintu byonse, kabiji mo mwi aye moalengejile byonse;*

*Kabiji aye ye kusama kwa lukumo lwanji, kabiji ye kipasha kya musango wanyi, kabiji ye ulama bintu byonse na jiwi ja bulume bwanji, ne byo . . . waikajile ku kilujo kya Mwine mfumu wa mwiulu;*

<sup>3</sup> Twayai tukunyike mitwe yetu tulombe. Pano mu Kyeenyi Kyanji kya Bulesa, inge muji na kyakukabila kiji kyonse kyo mukeba kumuyukisha Aye, sutulaikotu kuboko kwenu, kabiji ako ko kukabila kwenu, amba Lesa akonshe . . .

<sup>4</sup> Taata Wetu Wamwiulu, pano tubena kwiya ku jitanda Jenu, konka kulwitabilo mu Jzhina ja Yesu Kilishitu, Mwaana Wenu. Kabiji twapewa lulwe luketekelo, amba, “Inge twaipuzha kiji kyonse mu Jizhina Janji, kikemupewa.” Kabiji Anweba mwayuka milanguluko yetu ne byakubila byetu, kabiji Anweba mwalaya mba Mukapana byonse byo twakajilwa. Nanchi, Taata, twalomba monka mo mwitufunjishe, “Bufumu Bwenu bufike. Kyaswa muchima wenu kyubiwe panopantanda, byonka byo kyaubiwa Mwiulu.” Kyakuuba mba kukabila kwetu, bufuku buno, kwikale monka mwaila kukeba Kwenu kwa kwikipana, kabiji ne kupana kwi atweba onse mashuko. Shingai manyi Kyambo, Nkambo, ne bonse basapwishi ne babena kuteleka, kabiji lekai Mupashi Wazhila atwele ne kwikala wakuuba Kyambo, bufuku buno, mukachi ketu. Mambo twikipuzha mu Jizhina Janji. Amena.

Anweba ikalaiko.

<sup>5</sup> Keesha lukeelo kelo, Nayuka mba, ke kajo kakwiaula ka ba Full Gospel Business Men. Javula, inge baikala na kyapitala, Amiwa ngikala na jishuko ja kwambapo pa kajo kakwiaula. Kufika pa kino kimye, ko konka kabungwe, ako kabula kwikala bukabungwe, bino, jo jonka jibumba Ami jo—Ami jo njiko nalubaji, ke ba Christian Business Men. Kabiji bino Amiwa ngikalatu musapwishi wakulubaji lwabo, waimenako ntanda yonse.

<sup>6</sup> Pano, bufuku buno, twaketekela mba akwe kupwila kechi kusakwikala kwantutu ne. Amiwa naiya kwi anweba, kasa nakoka, pashingo papwa-bingi, kabiji natambwile muchi mucheche, kufuma . . .

<sup>7</sup> Nafuma ku Tucson ako kwawama bingi kabiji kwauma, kabiji Naiya kuno kwawama bingi kabiji kwateka, nanchi paji bingi lupusano. Inge anweba bonse muji na meema kuno, inge mwakonsha kwi atumatu kotuji, twakonsha kusata bingi. Pakuuba kuuba mwauba kyokyo ne, nangwa byonkabyo.

<sup>8</sup> Bino Amiwa ne mubuula kintu kimo, paji kishipi popo. Byonse byetu—byetu—byetu bintu mu Arizona, binchi byetu, mwayulatu bilamachila. Bintu byonse biji na bilamachila. Ke mambo akuuba mba kwauma. Pano inge akya kipupu kimo kyakomena kuno, kyakonsha kwikala na jibula jawama bingi. Monai, kiji kwabula meema, oene mambo kyo kikela kya kulamachila.

<sup>9</sup> Kabiji umvwe kipwilo kyaikala kwakubula Meema a Bumi, kikala kyauma kabiji kilamachila, ne akyo, kulamachila kabiji ne kukwata ku kiji kyonse. Pakuuba kuji meema Abumi kasa apita, kishikula jibula ne kwijilengela kwikala ja nekena, jawama ne kutobala, jazhila ne kwitabilwa kwi Lesa. Nanchi lekai Nkambo Lesa etutekezhe, bufuku buno, pakuuba mba tubule kwikala byakulamachila; pakuuba twafwainwa kwikala mabula awama kya kuuba mba bantu baya mungi bafwainwa kwikala mushi ya kinchi kya kivule kyetu kabiji ne kutana ku kokoloka kwa myeo yabo.

<sup>10</sup> Pano Mbena kukeba kusenda mutwe, bufuku buno, inge Nkambo waswa, kabiji Amiwa mbena kukoka kako ka maikolofoni kakacheche na kwikabwezha pepi monka Monafwainwa kubila, mambo akubula jiji. Nakeba kuuba, kufuma mu kutanga papo Bahebelu 1:1, Nakeba kutola mutwe wa kuba mba: *Lesu Kwimweshu Aye Mwine Kupichila Mubyubilo Byanji*. Lekai Mbwezhepo jibiji, mambo Nayuka mba akye kyakwambilamo kyatama kuno. Lesu kwimweshu Aye mwine kupichila mubyubilo Byanji.

<sup>11</sup> Bino, bintu byavula biimweshu kupichila mu byubilo byabyo. Kabiji Amiwa njina Binembelo bicheche kuno byo Nakonsha . . . kabiji monai, byo Nakonsha kutemwa kutazhako

milanguluko. Bino, byubilo bya kintu kiji kyonse bimweshwa musango ye kijimo.

<sup>12</sup> Bino, nobe mu bilengwa byonse, maluba ayukanyikwa, bimye byavula, kupichila mu byubilo byao. Inge biji pamo pepi pepi, musango umo ku kikwabo, byubilo bya joja jiluba bikamweshwa musango wajoja jiluba. Kabiji mwaila banyama bamungye, bimye byavula . . .

<sup>13</sup> Ami—Amiwa ne kibinda. Kabiji wakonsha kuyuka byubilo bya nyama ye ubena kwipaya, inge ne kimye kimo wakonsha kujimbaikwa. Kyakumwenako, nobe Mukoko wa mu Mitumba akwa ku British Columbia. Amiwa najinga ku Yukon kisalo kyapwile, balongo bavula baji muno pakino kimye ne amiwa, kabiji twaipailenga nyama.

<sup>14</sup> Bino inge kechi wayuka lupusano lujipo ne, kimye kyo mubena kulonda mukoko nangwa diyala, kechi wakonsha kuyuka lupusano lujipo ne kanatu waikala kibinda wajimuka. Mambo, balenga musango umo wa mikwala; baya na kwikasa kasa pa kunyema. Kabiji inge wamona umo kasa aimana palepa, na mutwe wanyi wafiiwa, kika, obewa—obewa kuba wayuka lupusano lujipo ne. Bajitu pepi nobe kimino kimo; kukilang'anya kyanyuma, kyatoka, nobe diyala. Kikala kyashupa bingi pakuuba mba wibayuke. Pakuuba masengo anji a muyukisha byubilo byanji, kupichilatu mu masengo. Mukoko uji na jisengo jazhokoloka, kabiji diyala uji na tunda yaimana. Kabiji kintu kikwabo, diyala kechi uya peulu ne, pakusaka kuja.

<sup>15</sup> Kabiji pano mbuzhi, pa kwenda, ne aye, muji byubilo mu mbuzhi, kabiji ne mu mukoko, pakuuba mba uyuke lupusano luji mwi abo, inge uji peulu popa, mambo bonse bekalu mu mitumba yalepa. Wafwainwa kuyuka lupusano. Bino inge wamona, aye—aye mbuzhi witetula aye mwine pa kwenda; pakuuba, mukoko wikizha maulu anji panshi nobe *bibye*, byo enda. Byubilo byo alengelamo mukwala wanyi. Obewa uyuka nyama obe kupichila mubyubilo bwa byobya bintu byo oba, kabiji ne byo oba, kabiji ne byo aja, ne bintu bikwabo. Wimweshwa aye mwine kupichila mu byubilo byanji. Kabiji inge wakilukapo umo, kabiji monai byo kyubiwa, wakonsha kubulang'ana monka mwaila kwenda kwabo. Mwakonsha kubulang'ana kupichila mulupusano lwa nyama.

<sup>16</sup> Inge mwakonsha kumona, kechi Nayuka ne kana muji nabo kuno nangwa ine, bang'onyi bakibobo; kyawama, fulika jo jizhina jabo jawama, kabiji ne lubafwa. Lubafwa ujitu pamo bukata na yeloama. Inge mwamona abo babiji kasa batumbuka, bonse babiji baji mumusango umo wa bang'onyi. Inge kechi wakonsha kumona mushobo ne, pakuuba bataletu, wakonsha kuyuka yeloama ye weepi. Lubafwa utumbuka, pepi pamo nangwa pacheche, nobe kisamba kya nyuki. Pakuuba yeloama, ubakama byapi byanji; byo abakamisha byapi byanji, aye uya

panshi ne peulu, panshi ne peulu. Monai, aye wiuba mwine nobe wakaswa, nobe *byobya*, kabiji wakonsha kuyuka mba abye byo byubilo bya yeloama, monka moatumbukila.

<sup>17</sup> Inge mwamona ki—kitetu inge kyalupuka, mujishinda mo kishila. Pano monai inge muji mu bisesa, mwafwainwa kwikala kitetu, kabiji ne—kabiji ne kafutubiji. Anweba babibinda mwayuka kyokyo. Awa Wilson kafutubiji ne jack kafutubiji, bemweshwa abo bene kupichila mu byobekala kabiji ne pa kutumbuka. Bemweshwa kupichila mu misango yabo yakutumbuka, ya musango wa kang'onyi ye ajimo. Onkao mambo, inge mwakonsha kwi bateleka, mwakonsha kubulang'ana kana kyokika, mujishinda jo batumbukilamo, byo aji, kupichila mu misango ya kutumbukilamo.

<sup>18</sup> Kijitu pamo nobe mwanamulume ne mwanamukazhi. Abo bonse babiji ke bantu, nagwa byonkabyo mwanamukazhi uji na byubilo byapusanako na bya mwanamulume. Amiwa natangilenga kuno, kimye kyapita kunyuma, na mambo akwa Solomoni ne Mfumu wa mukazhi. Amiwa kechi na kispwilapo Mbila yami icheche kuno, kwi anweba ne, pa mfumu wa mukazhi wa ku Kabeta ka bulenge, kwiya na kumona Solomoni, kabiji ne kumona akya kyabupe kya kuyuka bapashi. Natangilenga pa kyokyo, kuno konka kechi papita kimye kyabaya ne, kabiji baambile, mba, “Kintu kimo kyazhobakana kyaletelwe kwi Solomoni, kyajinga ke, awe mfumu wasendele mwanamukazhi, nangwa banabakazhi, nangwa byonkabyo, kabiji wibamvwikile nobe mwanamulume.”

<sup>19</sup> Bino, akya kyajinga kyenye mu joja juba, bino kine byaesakanatu-pamo-kino kimye, jaleelo. Kabiji—kabiji mwayuka amba akye kyatama. Aye Baibolo waamba mba mwanamukazhi kechi wafwainwa kuuba kyokyo ne. “Ke kyabunya mwanamukazhi kumvwala kivwalo kyapasha kya mwanamulume.” Kabiji Lesa ubula kwaluka ye waambile kyokyo, nanchi akyo ke kyakine.

<sup>20</sup> Nanchi twatana kuuba mba Solomoni, aye wibamwenetu, aye wibaswishishe kwenda nangwa kubapo kintu kimo, kabiji ponkapotu waambile mba, “Banabakazhi.” Monai, aye wakonsheshe kubulang'ana kupichila mu byubilo bya yewa mwanamukaczhi, mujishinda jo eubijilemo aye mwine, amba wajinga mwanamukazhi kechi mwanamulume.

<sup>21</sup> Kabiji kintu kyonse mujoja jishinda, na byubilo byakyo. Kijitu pamo nobe bantu bamo bengijisha kuboko kwa kipiko, ne bakuboko kwa kilujo. Ke byubilo byo bobilamo abo bene. Mwakonsha kuubalang'ana kana wa kilujo- nangwa muntu wakuboko-kwa kipiko, kupuchila mujisha jo bobilamo abo bene, jishinda jo bobilamo na kuboko kwa kipiko nangwa kilujo.

Kabiji vulukai, Yesu wajinga na kintu kyapasha byobyoy, kuuba mba . . .

22 Maboko abiji ajitu pepi. . . Ajitu musango umo. Bajitu na musango umo wa bikumo, ne fwachikilo ya minwe, minwe itanu; ya icheche, wapakachi, kabiji ne bikwabotu. Nobe byonka kuboko kwa kipiko kabiji ne kuboko kwa kilujo byo kuji na minwe imo, ya esakana, bukata pamotu, byo bimotu. Kabiji lupusano lujipotu ke, mwi abyo, kumo ke kwa kipiko ne kukwabo ke kwa kilujo. Alo lolupusanotu lujipo. Umo ke kipiko, mukwabo ke kilujo.

23 Nanchi mukyokyo, Yesu waambile mba. . . Nakonsha kubikapo kikomo kimo papo. Yesu waambile, mu Mateyo 24, amba, “Byubilo bya Mupashi bikekala bipasha mu moba a kupelako, bikepasha kyakuuba mba bikajimbaika bonka basalululwa inge kyakonsheka kubiwa.” Mwamona, abo bakonshatu. . .

24 Tolai kuboko kwenu ne kwi kukwachijijila. Monai, inge kechi mwakonsha kumweshwa bulongo ne, kumo kumwekatu nobe kukwabo, mujinda jiji jonse, bino kumo ke kwa kipiko ne kukwabo ke kwa kilujo.

25 Abyo ne mipashi byo iji mu moba akupelako. Ijitu pepi nobe pamo, bino kasa iji na byubilo biimweshwa musango mo byaikela. Umo uji bulongo, kabiji mukwabo kasa aji watama, kabiji wakonsha kuyukanyikwa monka mwaila byubilo byanji.

26 Aye Mupashi wa Lesa uyukanyikwa monka mwaila byubilo Byaji. Mwamona? Aye Mupashi wa Lesa, ne mupashi wa kipwilo. Kuji mupashi wa kipwilo, ne Mupashi wakwa Lesa ao wabula kupashang’ana na mupashi wa kipwilo, nangwa pachechetu ne.

Kuji mupashi wa dinominesheni.

27 Kyaalo kiji na mupashi wakyo. Kuji mupashi wa kyaalo. Kyaalo kiji kyonse, umvwe Nayamo, watwelamo, utana mupashi wapusanako. Amiwa naile mu Finland, bantu bawama, nangwa byonkabyo wajinga mupashi waki Finnish. Naya mu Germany, muji mupashi waki Germany.

28 Konka kuno kechi papita myaka yavula ne, Nailenga na bakazhi, mu kimye kyo twaikalanga mu Indiana, myaka yapita kunyuma, kokwa ku supamalikechi. Amiwa popo nabweleletu pa nzubo. Twailenga na kupota kajo. Kabiji mu mukwakwa wami kokakwa, atweba. . . Kyajinga kimye kya kisalo, kechi mwakonsha kwikiswa ne, bino twataine inetu wamvwala deleshi. Kabiji kyajinga bingi kyenye, Amiwa. . . Kyakumishe. Na—Naambile mba, “Talai kokwa, akya kibena kumweka kyenye, awa inetu wamvwala deleshi.” Bashala mu bonse bamvwajile byakuvwala byabujile. . . bya bulwa kufwainwa mwanamukazhi. Kabiji—kabiji aye waambile mba. . . Amiwa naambile mba, “Kyawama, awa ke mupashitu waki na America, mwamona, mupashi waki na America.”

29 Bino, mupashi waki na America, ke. . . kyafwainwa kwikala kyaalo kya Bwinakilishitu, pakuuba mupashi wa

kino kyaalo kechi wa Bwinakilishitu ne. Kyafwainwa kutelwa mba kyaalo kya Bwinakilishitu, bino kiji na mamilyoni mailoshi kupusanako, mu byubilo. Nanchi, awe mwanamukazhi, Naambile mba. . .

Aye waambile mba, “Kyawama, nanchi atweba kechi twibena America nenyi?”

<sup>30</sup> Naambile mba, Amiwa naambile mba, “Ine. Atweba twikala muno. Kino kyo kyaalo kyetu. Atweba—atweba—atweba twikala monka. Twi kitemwa. Ke kyaalo kyakila bingi mu kuwama pantanda ponse. Bino, nangwa byonkabyo, kechi twi bena America ne.” Naambile mba, “Atweba twafuma Mwiulu. Aye Mupashi Wazhila wikila panshi, kabiji atweba twiiba Mubufumu. Kechi boobwa ino ntanda ne.” Naambile mba, “Ao oene mambo banyenga kyo bamvwajila madeleshi, ne kwikala na suki yalepa, kechi boba bya kwipeta-peta ne. Monai, byubilo byabo bibamweshwa mba ‘bzhila kwi Nkambo,’ kufuma Kwiulu.”

<sup>31</sup> Onkao mambo, atweba tubena kukeba Bufumu. Atweba tubena kukeba Mfumu kwiya na kulonda bantu Banji ne kwibatwala ku Bufumu Bwanji. Kabiji bayukanyikwa kupichila mu byabo—byabo byubilo, amba bunoshi bwabo kechi bwa ino ntanda nangwa bwa kino kyaalo ne. Ke bwa mwiulu, mu Lukumo. Onkao mambo, abo, “Bakeba Muzhi Ao Tungi ne Mulenga ye Lesa.” Bayukanyikwa bingi bulongo.

<sup>32</sup> Inge kyakuuba mba Amiwa najinga na jiji ja baya ja kusapwila kwi anweba bufuku buno. Pakuuba Amiwa—Amiwa nafumapo pa kyokyo. Pano, kuyukanyikilwa monka mu byubilo byakyo.

<sup>33</sup> Twatana kyakumwenako kyawama mu kimye kya Isalela, byo bafikile mu ntanda ya mulaye. Kabiji Lesa wibechile monka mwaijile mulaye Wanji. Aye wamwambijile Abulahama mba, Aye ukooba. . . lukunwa waji ukekala mu kyaalo kya bwenyi, myaka foolo aduleendi, kabiji amba Aye ukebakokolola na kuboko kwa bulume, kabiji bakaya mu ntanda, ayo, yalailwe, mba yayulamo mukaka ne buki. Kabiji kimye kya mulaye byo kyafikile ke pepi, kwaishile awa—awa Felo wabujile kuyuka mingilo ikatampe yo aubile Yosefwa mukachi kabo.

<sup>34</sup> Kabiji, akye, Lesa waimenye ngauzhi watelwa mba Mosesa. Kabiji awa muntu wafunjishiwe mu maana onse abena Ijipita. Kechi kyaluzhinauko ne wajinga muntu mukatampe, wajimuka, muntu wafunda, mambo wafunjishenga maana abena Ijipita. Wamwekele nobe ye wajinga wafwa—muntu wafwainwa kuleta bupokolweshi.

<sup>35</sup> Bino, mwamona, kyo tuteela mba bupokolweshi, kabiji ne kyokya Lesa kyo ateela mba bupokolweshi, paji lupusano.

<sup>36</sup> Pano monai yuwe muntu na buyuke bwanji bonse. Aye wayukile mba wasemekejilwe kupokolola baana ba Isalela.

Nangwa byonkabyo, na kufunda kwanji konse, mu byonse byo ayukile, kabiji ne byo ayukile mba waichilwe na Lesa na kwingila mwingilo, wajinga na byonse byanji. . . Aye wajinga na Bachela wa Aati wanji, ne Ph.D. wanji, ne LL. D., kabiji ne bikwbotu. Kabiji aye waile na kupokolola Isalela, kabiji kyajinga kukakalwa kwapwijijika.

<sup>37</sup> Pano monai, kyamwekele nobe, aye byo ajinga wakwikala pa njitanda mu Ijipita, kwikala ke Felo, amba aye wafwainwa kupokolola baana ba Isalela panyuma yakwikala ke Felo, mambo aye wajinga mu ndonda yakulondelapo kwikala pa—pa njitanda. Bino, monai, amba, pa kwikyubila mu jojo jishinda, kechi kyakonsha kumwesha byubilo bya Lesa mu kupokolola bantu Banji ne.

<sup>38</sup> Aye waambile mba Ukebapokolola. *Aye* wakonsha “kwibapokolola na kuboko kwa bulume,” kechi Mosesa na zhita ya bulume ne, kana Lesa na kuboko kwa bulume.

<sup>39</sup> Twatana kuuba mba awe ngauzhi wanyemene kabiji wajinga mungyetu pa myaka foote. Kyasendele Felo myaka foote pakuuba mba amupishe mu kufunda, kabiji kyasendele Lesa myaka foote pakuuba mba ebifumyemo mwi aye. Nanchi twatana mba, juba jimo, amba aye, kunyuma ya kiselebwa, wakumenye Nkambo mu kipupu kibena kutema, mu musango wa Mumbulungwa wa Mujilo kasa aji mu kipupu. Kabiji bamwipwizhe kufumyako kwabilo yanji, amba, kifulo kyo aimanapo kyazhila. Pano monai yuwe wawaina, wafundwa, muntu wafunjishiwa, byo ajinga, talai kupipulwa kwa byubilo byanji byo akumenye Lesa. Aye waubile kyakila. . .

<sup>40</sup> Kimye kimo Lesa uba bintu mujishinda ja kwikepesha, kabiji mu musango umweka nobe kechi muji maana ne, mwaila ndangulukilo ya buntushi. Monai muntu wakakelwe mu mashinda onse; na mazhita abena Ijipita ne byonse bya muzhokolokele pakuuba mba obe kyaswa muchima wakwa Lesa, na kufunda kwanji, pa myaka foote, mu kimye kya ngovu yabwanyike bwanji. Aye papo, pa myaka eite, lukeelo lwalondejilepo, na mukazhanji kasa bekasa pa mbongolo, na mwaana pa mauu anji, ne mukombo mu koboko kwanji, kasa abena kuya ku Ijipita, na kwangata. Mwakonsha kwamba nayoya mwekelo yalubakana! Bino wamweshenga byubilo bya Lesa, mambo Aye wajinga na muntu wakonsheshe kuketekela Kyambo Kyanji. Byo byonka. Kine kintu kyajinga, mwakonsha kulanguluka mba muntu-umo kuya na kutula bulemo Ijipita, kwepi, zhita yakakelwe? Pano kyajinga kika? Byanji byubilo, nyingijilo yanji ya pipwilwe. Aye wailenga mu Jizhina ja Nkambo, “AMIWA YAMI NJIPO.” Kine kintu kyajinga mba, washijile. Aye wikyubile, mambo wailenga mu Ngovu ya Nkambo.

41 Palwendo lwanji, lwa kutangijila Isalela kuya ku ntanda ya mulaye, aye wakumenye mulongo wanji, mulongo wanji waki dinominesheni, Moabu. Bino, Moabu, kechi wajinga nangwa pacheche, mutushi ne. Aba bajinga baana bakwa mwaana wamukazhi wa kwa Loti. Umo wa mubaana babo wa—wasemene Moabu.

42 Pano, akwa, Nakeba anweba mumone abye byaalo bibiji, byaikele byapusanko. Awe ke Ijipita, pacheche, bapalang'enejilemo, kechi kwajingapo kyaalo kyakuyako ne, kechi kwajingapo ba bilolo nangwa mfumu ne, nangwa kikwabotu ne, nangwa uji yense kinemanga mukachi kabo ne, ke bantutu bajinga pa lwendo lwabo lwa kuya ku ntanda ya mulaye. Kabiji papo bafwajilwe kupita mu ntanda ya Moabu. Kyajinga monka mu ndonda ya mulaye.

43 Kabiji Moabu, ne aye, bajinga baketekela mwi Yehoba, kabiji bajinga na ngauzhi. Kabiji Isalela wajinga na ngauzhi. Bonse babiji bajinga na bangauzhi.

44 Kabiji pano monai, baishile bafika pa mpuzha apo ngauzhi wa kyaalo kya bukabungwe waishilenga na kufinga kikye kyaalo kikwabo, mambo lwajingatu luvilu, kechi bajinga na mpuzha pa kwikala ne. Nanchi baishile kufika kokwa.

Kabiji tajishai pa babo bangauzhi babiji: Inge twaiya mwaila ndonda, bonse babiji bajingatu pamo. Mambo, monai, Balamu, aye bishopo, wamubujile mba, “Pano, nshimikilai kyakusokelapo bitapisho sebeni.”

45 Sebeni ke nambala yapwijijika ya Lesa, kwimenako Mankulo a Bipwilo Sebeni, moba sebeni akulengelamo bilengwa nalesa, ne bikwabotu. Pano monai, sebeni, Lesa upwijijika mu sebeni.

46 “Byakusokelapo bitapisho sebeni, kabiji pa kyonse kyakusokelapo bitapisho babikilengapo awa—awa ng’ombe mulume.” Bino akyo kyajingatu musango umo wa kyakusokelapo bitapisho na byo kyajinga mulubaji lwa Isalela. Amwa mo bajinga mu Isalela, na kitapisho kimotu akyo kyo bajinga nakyo; kabiji ne kitapishotu kimo, ng’ombe mulume ne ng’ombe mulume; ngauzhi ne ngauzhi. Byaalo bibiji, byapusanako.

47 Ke kyakumwenako kyawama bingi mu jino juba jo tubena kwikalamo, inge twajinga na kimye kya kuya mukyokyo. Monai, Lesa kasa abena kuuba kikye mu kishipi, kyakuuba twatana mba, bijitu pamo.

48 Bino, ne aye, Balamu wakebelenga mukoko mulume pose pa kyakusokelapo bitapisho. Akyo kyaambilenga pa lwitabilo lwanji mu kwiya kwa Mesiyasa. Jikalala wa mukoko, mukoko mwanamulume, kyo kitapishotu kimo kyo bajinga nakyo mu Isalela; monka mukachi ka kamba wa Isalela, konka kuno...



mu Moabu. Abo . . . Mwailatu ndonda, bonse bajingatu bulongo, bino, monai, mwaila lufunjisho.

<sup>49</sup> Pakuuba ngauzhi umo mu lubaji lwa Isalela wajinga na byubilo bya kwa Lesa kabiji ne Kyambo kya Lesa. Aye waikele na mulaye wakwa Lesa wayoya nkulo, mambo mundonda ya kuya ku ntanda ya mulaye. Mwamona?

<sup>50</sup> Bino, mwaila ndonda ya lufunjisho, Balamu, Balaka bakonsha kuyukanyikilwatu pamo byonka byajinga Mosesa.

<sup>51</sup> Bino, mwamona, Mosesa, byoajinga ngauzhi wa Lesa waitabilwa, kechi wajingatu na lubaji lwa ndonda yonka ne, bino wajinga na kiyukilo kyakwa Lesa. Monai, aye wajinga mu ndonda ya mwingilo, kine byonka byalailwe mu yoya nkulo; kechi mu nkulo yakwa Nowa ne, pakuuba ke mu yonkaya nkulo yobajingamo. “Amiwa ke mutwala ku ntanda ya yulamo na mukaka ne buki.” Bajinga mujishinda jabo, kabiji Isalela wayukanyikilwe na ngauzhi wabo, Mosesa, na Mbila ya yoya nkulo. Lesa byubilo byanji byamwekele mwi Mosesa. Ne Mumbulungwa wa Mujilo kasa abena kumulondela. Aye kabiji wajinga ne na mfuto yamambo kasa ibena kwingila; kechi kwambapo pe ayo ne, pakuuba yaingijilenga. Kechi bintu bikekalako ne; kana byonka bijiko ponkapano!

<sup>52</sup> Monai, aye wajinga na mulolo walubemba ao wasutwilwe peulu na mambo a misongo ne bikola bya bantu, onkao mambo Mosesa waingijishenga lubuko lwa Bulesa. Aye wajinga na mfuto ya mambo, mulolo wa lubemba, kyamweshenga mba Lesa uji pakachi kabo, kabiji bantu batajilenga konka kuyewa mulolo wa lubemba ne kutambula batambwilenga lubuko.

<sup>53</sup> Kabiji wajinga ne na Jibwe ja kupumako ajo jibalondejilenga. Kabiji aja jamweshenga Lesa, kulama Meema a Bumi mukachi kabo, lusekelo ne lumpulukilo, amba kechi bakonsha konaika ne pakuuba kwikala ne Bumi bwa myaka ne myaka. Kyajinga ke kipasha kya . . . Aja Jibwe ja kupumako amwa mungye kyajinga kipasha kya Kilishitu wapuminwe.

<sup>54</sup> Nanchi, baendejilenga monka mu ndonda ya mulaye. Aky kyajinga kiyukilo, mu kumwesa byubilo bya Lesa. Nangwatu awe mukwabo wajinga na buyuke byepi bwa Kyambo; aye wajinga umo waboba baji na buyuke bwa byanembwa, kubikapotu ne kuyukanyikwa, kabiji ne byubilo bya Lesa mukachi kabo. Lesa wimwesa Aye mwine. Bangauzhi babiji, bonse babiji bangauzhi, kabiji bonse babiji bajinga na buyuke; bino Lesa wamwesheshe byubilo Byanji mwi Mosesa, mambo wajinga na byubilo byakwa Lesa.

<sup>55</sup> Bino, ne jikwabo, byubilo byakwa Lesa kimye kyonse byakilapo, mambo Aye wakilapo. Lesa wakilapo. Ke kintu kibula kubiwa ubiwa, kimye kyonse, mwaila ndangulukilo ya katataka. Mwayuka kyokyo. Lesa kimye kyonse walulula

kikochikala kya ma apo, mambo a—mambo a mabumba abupompweshi ajinga mu mankulo onse apita.

<sup>56</sup> Kabiji kechi kwajingapo nangwa kimye kimo akyo muntu nangwa jibumba ja bantu po jibungizhe ajo jine na mambo ambila ne pakuuba bafwile ne kutulwa pakitala, kabiji kechi babukilepo jibiji ne. Kechi kujipo jishimikila ne. Bena Luther, ba Presbyterian, ba Methodist, ba Baptist, ba Pentekosito, ne bakwabotu, kechi baimenepo jibiji ne, ingetu baya mu Kwibungizha.

Lesu wingila na umo umo.

<sup>57</sup> Monai, Aye waikala wapusanakotu mu jishinda jo alangulukilamo. Mwamona, tufumamo mu ndonda, kabiji twafwainwa Kwikiswa *mu jije* jishinda. Kabiji Lesu wiya na Kyambo Kyanji kyo Alaile, kabiji ne kwiyukisha Aye mwine mu kyokya Kyambo. Aje jibumba kechi jakonsha kuyako kwi Ajo ne, mambo kechi jaketekela mu Kyokyo ne. Mwamona, jichibako ajo jine kufuma ku Kikye.

<sup>58</sup> Nobe Yosefwa, aye wajinga mwana wa kwa Davida, kabiji muntu wawama, Yosefwa mulume wani Maliya. Aye wajinga muntu wawama, kabiji kwakubula ne luzhinauko ne watangilenga Baibolo, ne mivungilo, kimye kyonse, mambo. . . kabiji wapembejilenga Mesiyasa kwiya, kabiji wafwaijilwe kuyuka mwaambila Kinembelo amba akye kikobiwa. Isaya waambile mba, “Kisungu ukemita.”

<sup>59</sup> Kyawama, pano, aye wailenga na songwakazhi wani mwanyike, Maliya, kapepo wa myakatu eitiini, kabiji aye kape wajingapo mukulumpu. Kabiji pano byo amwipangwizhe kuba mba amusongole, wamwekele kwikala semi. Bino akyo kyajinga kyamukosela Yosefwa pa kuuba mba aswe kyokyo. Kechi pajipo luzhinauko mba Maliya wamubujile lupepu lwa Ngabaliela. Bino twamona, jishinda byubilo byanji mo byamutwajilenga, aye wikizhinaukile.

<sup>60</sup> Bino bamutaine na jimi kasa bakyangye kwisongola ne. Kabiji, mu Baibolo, kumanyikwa ku kyokyo ke lufu, kupichila mu kumwasa mabwe. Mwanamukazhi wabula kusongola kwikala na jimi, bafwaijilwe kumwasa mabwe. Kechi mwajinga buule mu Isalela ne. Be bufumishemo. Nanchi twatana kuuba mba, mu Mpitulukilo ya mu mizhilo, ye witubula byobyo.

<sup>61</sup> Pano twatana kuuba mba, Maliya, wamwekele nobe ubena kufyamatu mwi Yosefwa na kyubilo kyo aubile. Mambo, inge watainwe kala mba uji na jimi kasa bakyangye kwisongola ne, nanchi wafwainwa kwaswa mabwe, kabiji wafwainwa kwikala na muntu umo ao uji nobe kyakufyamamo. Kabiji akya kyamwekele, kyosetu, nobe byo akebelenga kuuba.

<sup>62</sup> Bino Yosefwa pa kumutala mu meso anji abaya alamba, kabiji ne aye waambilenga mba, “Yosefwa, Ngabaliela wambujile mba, ‘Aye Mupashi Wazhila ukakunyeng’amina,

kabiji ne kikye Kintu kikemitwa mwi obewa—mwi obewa ke kya Mupashi Wazhila. Ke Lesa. Akyo Kikatelwa mba, ke “Mwaana wa Lesa.”” Kabiji, Yosefwa, aye—aye—aye wakebelenga kwitabila kyokyo, bino kyajinga kintu kibula kumweka mweka. Akyo kechi kyamwekelepo kala ne.

<sup>63</sup> Kabiji abyo byokiji ne buleelo. Inge twakonshatu kuuba . . . Inge Najinga na jishinda ja kumwesheshamo bantu bintu bibula kumweka mweka bya kintu kiji kyonse, inge kyayukanyikilwa kupichila mu Kyambo, nanchi byubilo byakyo bimwesa musango ye kijimo. Ke Lesa munyingijilo.

<sup>64</sup> Yosefwa wafwaijilwe kuyuka kikye. Wafwaijilwe kuyuka, “Kisungu uketemita jimi.” Pakuuba aye wajinga na bukinshika pa kikye kintu. Aye kechi wakebelenga ku mukaina, kwabuke ne, aye—aye walangululenga mwa kwikyubila.

<sup>65</sup> Kabiji aye Malaika wa Nkambo wamumwekele mu kiloto. Bushe anweba mwakumyapo ene mambo Aye kyo amwekejile mu kiloto nyi? Kechi kwajinga ba ngauzhi mu oa moba ne. Kiloto kyabo kyajinga kyapela bingi, kechi kya kebelwenga ne kwikituntulula ne. Waambile mba, “Yosefwa, obewa mwaana Davida, kechi uchine ku musongola mukazhobe Maliya ne, mambo kyo aimita munda mwanji ke kya Mupashi Wazhila.” Monai, nanchi, akyo kyapwisha byonse. Monai, Aye waishile kwi aye mu kiloto, mujishinda jabubiji. Bino, mwamona, kechi kwajingapo ngauzhi mu kyokya kimye wakuyuka mwaila Kyambo ne, amba, “Awe ye kisungu ukemita.” Mwamona? Nanchi, onkao mambo, Aye wamwekele kwi aye mukiloto, mambo wajinga wakishika ne koloka kabiji muntu wawama.

<sup>66</sup> Kabiji Naketekela mba Lesa wakonsha kwiya ku muntu yense wawama, mujishinda jimo, kabiji ne kuyukanyikwa mu ngubilo Yanji kuyewa muntu wawama, ku yoya nkulo, inge awa muntu waitwa kwi Lesa muyoya nkulo.

<sup>67</sup> Bino, pakuuba kyajinga kibula kumweka mweka, abo kechi bekikwatakenye ne. Bino, kimye kyonse, kimwekanyika mwaila mulaye wa Kyambo kuyoya nkulo, byonse bye bintu bibula kubiwa ubiwa.

Bino kuji bantu bamo bafwainwa kuya konse konse, na kwamba mba, “Kyawama, *akye* ke kintu kibula kumweka mweka, ao Lesa. *Akye* ke kintu kibula kumweka mweka.”

<sup>68</sup> Bino, mwamona, kyafwainwa kuyukanyikilwa mu Kyambo, kabiji Kyambo ye Lesa. Mwamona? Kabiji nanchi byubilo bya kikye kiyukilo bimwesa byo aji, mambo Lesa waambile mba, “*Akye* kikamweka,” kabiji kyamweka. Mwamona? Byubilo bya kikye ke Kyambo kya Lesa kibena kuyukanyikwa na byubilo bya bintu bibena kubiwa.

<sup>69</sup> Aye waambile mba mu moba akupelako Uketulwila Mupashi Wazhila. Aye wikyubile. Byubilo bya kyokya bya mwesheshe

mba kyajinga Lesa, Kyambo Kyanji byo kyalaila. Monai, kimye kyonse kiimweshwa akyo kine.

<sup>70</sup> Bino, bimye byonse, kimye kyonse, kyoolola kyambo, umvwe Kyambo kyaambiwa bubu. Bushe mwamona nyi? Kyajinga mu moba akwa Nowa, akya kyaolwele aya nkulo ya masaayasi, amba Lesa ukanokeshwa meema kufuma mwiulu. Kyajinga Mosesa, monai, akya kyalungamikile mu kimye kyo baikele mu Ijipita, kabiji ne bikwabotu, bino Kyambo kya kwa Lesa kyaishile na kuyukanyikwa. Kabiji Bukine bwa Kyambo boolola kilubo.

<sup>71</sup> Lekai amiwa ne mwipuzheko kintu kimo. Twakonsha kuyako palepa papo. Amiwa kechi nafwainwa kusampwila mafunjisho nangwa lufunjisho, bino lekaitu ne mwipuzheko kintu kimo.

<sup>72</sup> Yesu wajinga Kyambo. Twayuka kyokyo. Aye Baibolo ye wikyambile. Yoano Wazhila, kyapitala kyabu 1, “Muntendekelo mwajinga Kyambo, kabiji akya Kyambo kyajinga na Lesa, kabiji akya Kyambo kyajinga Lesa. Kabiji akya Kyambo kyaalukile ke muntu ne kwikala wa ikelenga muno mwetu.” Aye ukijitu Kyambo. Pano kimye Aye kyo ayukile milanguluko yabo, bafwaijilwe kuyaka mba akya kyajinga Kyambo, mambo Kyambo kya kwa Lesa kyaambile mba abya byo Akooba. Aye wajinga Ngauzhi.

<sup>73</sup> Pano monai, twatana kuuba mba Aye kimye kyo asemekelwe, byo afikile pa myaka twelufu, Aye waille ku kijilo kya mimba. Kabiji baile kokwa ku Kijilo kyalupitailo. Kabiji, pa kubwela kwabo, baendele misiso ya moba asatu kabiji abo Aye kechi ba mumwene ne; bayukile, balangulukile, nangwa byonkabyo, bamwene nobe Aye wajinga mukachi ka bantu babo.

<sup>74</sup> Twakonsha kufumyapo lufunjisho pa kikye. Akyo kyabaya bingi mu buleelo! Pakuuba anweba ba Methodist, Baptist, Presbyterian, Balutheran, Katolika, musango yense ye waikelamo, monai, anweba mubena kuubatu kintu kimo. Anweba mwayuka mambo akuuba mba Wesley wajinga na kusangululwa kukatampe bingi, Luther wajinga na kusangululwa kukatampe bingi, nangwa ba Pentekositi bajinga na kusangululwa kukatampe kwabaya bingi, anweba mubena kulanguluka mba Aye uji mukachi ka bantu, apo, kimye kimo Aye kechi uji muno ne.

<sup>75</sup> Baile na kumukeba Aye. Kwepi ko Bamutaine? Konka ko Bamunshile, ku Yelusalema. Kabiji byo Bamutaine, kika kyo Aubilenga? Songwalume mucheche, wa myaka twelufu, kape kechi watwelelepo mu sukuulu ne kanatu byonka bya Mufunjile Bainanji; kabiji apo wajinga mu tepo, kasa ebana kwipachika na booba ma pulisiti, pa Kyambo kya Lesa. Kabiji bakuminye bingi pa kumona maana ajinga nayuwe Mwanyike. Kika? Aye wajinga Kyambo. Pano monai.

<sup>76</sup> Kabiji pano kechi kwi mulengulula anweba bantu ba ki Katolika ne pa kwita Maliya mba inaja Lesa, bino lekai ne mumweshopo ka kilubo kacheche papo. Inge kipwilo kyanshimikwa pe Maliya, monai kyamwekele. Pano aye waishile ne kwamba mba, “Oo, Ba shobe ne Amiwa tubena Nkukukeba, na mipolo.” Monai yoya ng’ambilo, aye wazhachishe lushimuno lwanji mwine. Aye waambile mba, “Ba shobe ne Amiwa tubena Nkukukeba, na mipolo.”

<sup>77</sup> Monai kyokya Kyambo. Aye wajinga Kyambo. Waambile mba, “Kechi mwayuka mba Nafwainwa kwingila mwingilo wa Ba Taata nenyi?” Monai Kyambo ke kyolole kilubo. Ponkapa pa menso aba mapulisiti, aye waonawinenga lushimuno lwanji. Waambile mba waimichile jimi ja Mupashi Wazhila, kabiji papo ke ambe mba Yosefwa Ye “shanji.” Monai akya Kyambo kyakwatakanya lubilo lubilo? Aye wajinga Kyambo. Bino, mwayuka songwalume-wa myaka-twelufu kechi wakonsha kuuba kyokya ne. Aye wajinga Kyambo. Aye wajinga Kyambo kyaambiwa kya yoya nkulo, nanchi onkao mambo byubilo bya Lesa bimwesheshe mba biji mwi Kilishitu. Aye waolwele bilubo. Aye waambile. . .

Baambile mba, “Kika, atweba twi banababwanga bakwa Mosesa.” Mwamona?

<sup>78</sup> Aye waambile mba, “Inge anweba mwajinga banababwanga bakwa Mosesa, mwafwainwa kungyuka Amiwa. Aye wanembele pe Amiwa. Mosesa waambile mba, ‘Aye Yehoba Lesa wenu ukemwimenya Ngauzhi uji pamo nobe amiwa.’ Anweba mwafwainwa kungyuka Amiwa inge mwamuyukile Mosesa.”

<sup>79</sup> Kabiji, monai, Kyambo kimye kyonse kyolola bilubo bya mu joja juba. Bino bantu kechi batemwa kwikiketekela ne. Abo batwajijilatu byonkabya, mu musangotu umo.

<sup>80</sup> Pakuuba Yesu waolwele bainanji Mwine. Kabiji Bainanji bajinga mu kilubo, mambo aye waambijile jimo amba awa Mwaana wayimitwa mwi aye wajinga wa Mupashi Wazhila, kabiji papo waalulula lushimuno lwanji ke kwamba mba Yosefwa ye wajinga “shanji,” wajinga bashanji ba—bakwa Yesu. Pano inge—inge Yosefwa. . .

<sup>81</sup> Inge wajinga mwaana wakwa Yosefwa, inge Aye waubilenga mwingilo wa Bashanji, Aye wafwaijilwe kwi-kala mu shopu wabusendwe bwa mapulanga.

<sup>82</sup> Pakuuba Aye wajinga namwingilo wa Ba Shanji, amwa mu Tepo, kasa abena kulengulula atwa tubungwe. Mwamona? Aye waingijilenga mwingilo wa Ba Shanji, mino kasa ajitu Mwanyike wa-myaka-twelufu. “Kechi mwayuka mba Nafwainwa kwingila mwingilo wa Ba Taata nenyi?”

<sup>83</sup> Bushe mwamona Yesu byo bamutwajile mulweseko kwi Satana? Byubilo byanji popa, kimye kyo Ajinga mu lweseko Lwanji, kya mumwesheshe mba Aye wajinga Lesa, mambo

waikele na Kyambo. Mwamona? “Kyanembwa mba,” byo byaambile Satana.

Yesu waambile mba, “Kabiji kyanembwa mba,” wajingatu monka mu Kyambo.

<sup>84</sup> “Lesu, mu bimye byakala,” byo tutanga papo. “Lesu, mu bimye byakala,” bimye byapita, “mu misango yapusanapusana,” mu mashinda avula, “wiimwesheshe Aye mwine ku bangauzhi Banji kupichila mu bimwesho.” Akya kyajinga kiyukilo kya ngauzhi, byo aambijile jimo bintu bikobiwa kabiji bya mwekele. Bino akya kyajinga ke kyubilo kya kayukilo kanji, amba Lesu wajinga nanji. Nanchi akya mupele nsambu ya kulumbulula Kyambo kya mujoja juba, mambo, “Akya Kyambo kya Lesu kyaishile kuba ngauzhi,” byubilo bya ngauzhi, ke Aye kwambila jimo.

<sup>85</sup> Aye Baibilo waamba mba, “Inge kwaikala umo, kabiji ne byo aamba byafikizhiwa, nanchi kamumvwayi; pakuuba, inge kyabula kubiwa, kechi mukamuswe ne, kechi mu kamuchine ne, pakuuba Kyami . . . abya—abya Kyambo Kyami kechi kiji mwi aye ne. Pakuuba umvwe kyafikizhiwa, abya Kyambo Kyami kiji mwi aye.” Akya kyo kiyukilo kyanji. Akya kyo kiyukilo kya ngauzhi.

<sup>86</sup> Bino, Lesu, mu bimye bya kunyuma, abyo Aye byo byo amwesheshe byubilo Byanji bya kumuyukilako Aye mwine ku muntu, kupichila mu muntu ao waichilwe kwikala ngauzhi. Bino, Baibolo waamba mba, “Lesu, mu bimye byakala, mu misango yapusanapusana, waambile ku bashakulu kupichila mu bangauzhi.”

<sup>87</sup> Kabiji tutanga, monka mu Petelo wa Kibiji, amba Kyambo kyonse Lesu kyanembelwe kwi abo. “Banabalume bakala, batwajilwe twajilwe ku Mupashi Wazhila, banembele Baibilo.” Bajinga bangauzhi. Akye Kyambo kyaishile kwi abo kabiji be Kinembele, bekinembele, pa kutangijilwa. Kitanshi bajinga bangauzhi bayukanyikilwe, nanchi ipo—ipo po banembele Kyambo kyashingwa, kabiji bajinga na kilumbululo kya lumwekesho lwa Bulesa mambo wajinga Lesu mu muntu.

<sup>88</sup> Nanchi aja jojishinda Aye jo emwesheshemo Aye mwine mu byubilo Byanji bya kuyukanyikilwamo, bimwesho byabo byashinikishiwe, byajinga byubilo bya Lesu mwi abo, kasa abena kwi yukisha Aye mwine ku bantu.

<sup>89</sup> Pano, jojoka jishinda Aye jo aikajilemo mwi Kilishitu. Ngauzhi wajingatu kajipeke kakacheche. Kilishitu wajinga kuyula konse kwakwa Lesu. Kabiji Lesu wajinga mwi Kilishitu, kasa abena kupwanya ba panopantanda kwi Aye mwine. Kabiji byubilo Byanji bya Muyukishe, musango ye Ajingamo, kyakuba mba Aye waambile mba, “Inge Amiwa nabula kuuba mingilo ya Ba Taata, kechi mwikiketetele ne. Inge Amiwa nabula byubilo bya Ba Taata, kechi mwakonsha kungitabila Amiwa ne, kechi

mwakonsha kuketekela byo netumbijika ne. Inge Amiwa kechi jipo na byubilo bya Ba Taata mwi Amiwa ne, nanchi kechi mwakonsha kwikitabila, nangwa pachechetu ne.”

<sup>90</sup> Bino, byubilo Byanji kechi bikingya ne. Lesa kechi wakonsha kupipula byubilo Byanji, byonka biji—biji—mwanamukoko kechi wakonsha kukingya byubilo byanji ne, nangwatu kintu kikwabo kechi kyakonsha kukingya byubilo byanji ne. Mambo, kikulutu uji mumusango wanji mooba mulengejile, monka mo bamulengejile. Kabiji umvwe wa kingya mu musango uji yense, nishi obewa wakingya kufuma mu musango mo walengejilwe.

<sup>91</sup> Kijitu pamo nobe watola—ngulu mulume, ne kumomvwa awa ngulu mulume ne—ne kumushinga pechi kungala ya ku maulu, nobe byonka byuba banabakazhi, bepeta ku mivumbo yabo, kabiji ne kumvwala ndeleshi yawama. Mukasululai awa ngulu mukazhi, wakonsha kubwela mundochi, kabiji ne kwalang’ana mundochi jibiji. Kika? Aye ke ngulu mukazhi, kyo kyonka. Bino, kabiji, bino, mwayuka, kechi mwakonsha kulenga . . .

<sup>92</sup> Mwanamukoko kechi wakonsha kuuba kyokyo ne. Aye kechi wakonsha kuya mu machipa ne. Aye kechi ujipo na kintu kimo kya kuuba nakyo ne. Ke byubilo bya musango wanji. Mwamona? Mwakonsha ku muvwika mu musango umo wamvwajilo, bino kechi wakonsha kuuba ne, aye kechi wakonsha kuya ne. Pangye kechi paji lukatazho ne; kanatu mukachi. Bino, Lesa byoaji nsulo ya bumi bonse . . .

<sup>93</sup> Kechi mukakalwe kumvwa kikye ne. Mbena kweseka, na byonse biji mwi amiwa, kuuba mba anweba mumonepo kintu kimo. Mwamona? Ke kya kubuwame bwenu, balunda. Ke kya kwenu kulu—kulubaji. Mwamona?

<sup>94</sup> Amiwa kechi naishile kuno na mambotu akuuba mba muumone ne. Amiwa kechi naishile kuno, mambo kechi kwajinga mpuzha ikwabo kwa kuya ne. Naishile kuno mambo Natundaikilwe mba ngiye kuno. Natundaikilwe mba mwingilo wa Nkambo ye ampele a mweshiwe mukachi ka bantu kuno, kabiji Mbena kweseka kwi mumwesa Lesa musango ye ajimo. Aye kyo Kyambo Kyanji kyalailwa. Aye kimye kyonse ke Kyambo, kabiji Aye wimwesa Ayemwine kupichila mu byubilo byo Alaile. Kyubilo kimo kyakonsha kumweka mu kimye kimo, monka mu Kyambo, nanchi byubilo bya yuwe muntu wafwainwa kwiya bimwesa mba awe yeyewa muntu.

<sup>95</sup> Ao oene mambo Yesu kyo Aikajile muyewa musango ye Ajingamo. Bafwajilwe kwi kimona. Oene mambo kyo baikajilwe bampofu. Kine kintu . . . Waambile mba, nangwa waubiletu bya kukumya byavula byepi, abo kechi baketekejile ne, mambo Isaya waambile mba, “Baji na meso ne kumona ne, kabiji baji na matwi ne kumvwane.” Mwamona? Kila nkulo, kechi nkulo Yanji yonka

ne; mankulo onsetu, byepi, “Lesu, mu bimye byakala, mu bimye byapusanapusana,” nangwa byonkabyo kechi be kyumvwine ne.

<sup>96</sup> Bino, byubilo Byanji kechi bikakalwa ne. Kimye kyonse bijitu pamo. Bino, vulukai, byubilo Byanji, byubilo byakwa Lesa, kechi ukakalwa ne. Inge kyaubiwa, nishi Lesa wakakalwa. Kabiji Baibolo waamba mba, mu Bahebelu 13:8, amba, “Yesu Kilishitu ujitu pamo keesha, leelo, ne myaka yonse.” Onkao mambo, Aye ye Lesa ubula kwaluka. Byonka byubilo Aye byo ajinga nabyo kutendekelo, Ujitu na byubilo bimo. Mashinda onse Aye moaingijilenga, kimye kyonse Aye kyo aubile kintu kiji kyonse, Wikyubilatu mu jishinda jimo kimye kyonse. Inge Aye wabula kwikyuba, nishi byubilo Byanji bya kingya, monai, kabiji byubilo Byanji bimweshu kintu kimo akyo kyabula kyakwa Lesa. Mwamona? Nanchi atwebu kechi twakonsha kuyuka ne kana kwepi . . .

<sup>97</sup> Byonka byaambile Paulo mba, “Inge ntolopita yamvumya kilulumo kyabula kuyukanyikwa, ing’anyi ukayuka kwingezha kuya ku nkondo, inge ntolopita yamvumya kilumbululo kyabula kuyukanyikwa?” Pano inge ntolopita yamvuma mba “kubwela panyuma,” akyo kyo twafwainwa kuba, kubwela panyuma. Inge ntolopita yamvuma mba “yainga kulutwe,” abyoy byo twafwainwa kuba, ke kuya kulutwe. Pano Ntolopita yoika? Ke Kyambo kyakwa Lesa. Kimweshu Lesa, kana ke—kana ke “kuya peulu, ikala panshi, bwela panyuma, kusutula maboko,” monse mokyaikela. Ke kilulumo kya Ntolopita yakwa Lesa.

<sup>98</sup> Kabiji kilulumo kyamvuma kilulumo kingi, inge Baibolo waamba mba kintu kimo kyafwainwa kubiwa; muntu umo waamba mba, “Oo, akyo kyajinga kya mu juba jingi, byonkabyo.” Nishi kuji kilulumo kyabula kuyukanyikwa. Nanchi kechi wakonsha kuyuka byakuba ne.

<sup>99</sup> Yesu waambile mba, “Amiwa nji nangovu yakubika bumi Bwami panshi kabiji ne kwibusangula.” Kechi pajipo kilulumo kingi popo ne.

<sup>100</sup> Awa mwanamukazhi waambile mba, “Twayuka mba Mesiyasa ukeya; kabiji byo Akeya, Aye uketubula bintu nobe byonka byo Aubile.”

<sup>101</sup> Aye waambile mba, “Amiwa yami Iye.” Kechi pajipo kilulumo kingi pakyokyo ne. “Amiwa yami Iye.” Uu-uu! Amena.

Baambile mba, “Bashakulu betu bajilenga manna mungyetu.”

<sup>102</sup> Aye waambile mba, “Abo, bonsetu, bafwa.” Aye waambile mba, “Pakuuba Amiwa yami Shinkwa wa Bumi wafumine kwi Lesa Mwiulu.” Kechi pajipo kilulumo kingi ne. “Amiwa ne Kinchi kya Bumi, kufumatu ku bujimi bwa Edena.” Ine, ine kechi pajipo kilulumo kingi pa kyokyo ne. Kechi ibyo ne. Kechi pajipo



kyabula kuyukanyiwa pakyokyo ne. Aye wajinga na bukishika pa bintu byonse byo Aubile.

<sup>103</sup> Aye Baibolo kechi upanapo kilulumo kingi ne. Kimwasha byubilo byakwa Lesa pa kumvuma Kwayo.

<sup>104</sup> Yesu waambile mba, mu Yoano Wazhila 10:37, “Inge Nabula kuuba mingilo ya Ba Taata, kika. . . kabiji kechi njipo na byubilo bya Ba Taata ne, kechi mwakonsha kungitabila Amiwa ne. Yo yonka, imwasha byubilo Byanji mwi Amiwa, byubilo Byanji.”

<sup>105</sup> Mambo, ba Taata kyo Kyambo, “Mu ntendekelo mwajinga Kyambo, ne kyokya Kyambo kyajinga na Lesa, ne Kyambo kyajinga Lesa,” kabiji ne byubilo bya Lesa bimweshiwa kupichila mu mulaye Wanji wa muyoya nkulo.

<sup>106</sup> Pano umvwe Aye waikele mu kimye kya kwa Mosesa, inge kechi kyaingijile ne. Kabiji umvwe Mosesa waikele mu kimye Kyanji, inge kechi kyaingijile ne. Inge waikele mu kimye kya kwa Nowa, inge kechi kyaingijile ne, nangwatu inge Nowa waikele mu kimye Kyanji. Nowa waawilenga bintu bya mujoja juba, kabiji byubilo byanji ne byo aubile bya mumwesheshe kwikala na Kyambo kya Lesa. Mosesa waubile kintutu kimo.

<sup>107</sup> Kabiji papo Yesu waiya, kabiji ne Kyambo kyalailwe mu yoya nkulo kyayukanyikilwe mwi Yesu Kilishitu kupichila mu byubilo bya Kyambo, akyo kiji Lesa. Amena.

<sup>108</sup> Kwitulwilwa kwa Mupashi Wazhila, mu moba akumpelo, kwiya pa bantu, kyayukisha byubilo bya Lesa na bantu. Aye wikilaile. Ke Kyambo. Aye waambile mba Ukeyyuba. Kafwako nangwatu umo wakonsha kwikibwezha panyuma ne. Aye waambile mba Ukeyyuba.

<sup>109</sup> Nanchi bintu byonse Aye byo alaile, byo byonka Aye byo obapo. Kimweshatu byubilo Byanji. Ee, mwane. “Kechi mwakonsha kwikitabila ne, kechi mwitabile byong’amba mba Nakonsha kuuba ne, inge byubilo Byami kechi byobya kwa Lesa ne.”

<sup>110</sup> Pano monai mu Yoano 14:12, “Aye wangitabila Amiwa,” Waambile mba, “uji na kiyukilo Kyami, byubilo Byami. Aye wangitabila Amiwa, mingilo Yonguba ne aye ukeyyuba.” Akyo kiyukisha mba byubilo byakwa Kilishiti biji mwi aye, kasa bibena kumwasha byubilo Byanji. Amena.

<sup>111</sup> Naikala na ng’umvwino ya bumpopweshi ponka pano, inge jiji Jami jayoyomena. Ee, mwane. Oo, ami! Monai, kechi pajipo kilubo pa Kyokyo ne! Bumi Bwanji! “Aye wangitabila Amiwa, mingilo Yonguba ne aye ukeyyuba.” Monai, akya kimwasha byubilo.

<sup>112</sup> Kintutu kimo Aye waambile mba: “Inge byubilo Byami byabula nkumwasha Amiwamwine,” Lesa mwi—mwi Aye, nanchi Aye. . . kechi Bamwitabijile ne. Bino, kabiji Aye

waambile mba ukayukanyikilwa mu kyokyo. Nanchi, mba, inge kyabula kumuyukisha Aye, nanchi Aye kechi uba byo Amba ne.

113 Kabiji, leelo, inge Kilishitu kechi wimweshwa Aye mwine, byubilo bya Kilishitu bimweshwa mba atweba twiba Kilishitu, baketekela Kyambo... Yesu wajinga Kyambo, nanchi Aye waketekejile Kyambo. Kabiji twakonsha kwamba byepi amba twiba kwa Kilishitu, kabiji kasa tukanapo Kyambo kimo kya Baibolo? Aye Mupashi Wazhila wa Kilishitu ke Lesa mwi obewa, kabiji Uketabizha mulaye yense na "Amena." Aye Baibolo waamba mba, "Bino biyukilo bikebalondela baitabila." Aye Mupashi wa Lesawaamba mba, "Amena." Mwamona?

114 Umo wa mwiabo kechi wamba mba, "Ine, abyo byajinga bya kimye kikwabo; abyo byajinga bya batumwa kwapwa."

115 "Yainga pano pantanda ponse mukasapwile Mamboawama ku kilengwa kyonse. Aye, konse konse pano pantanda ponse, awa waitabila, bino biyukilo bikamulondelanga, kintutu kimo." "Ujitu pamo keesha, leelo, ne myaka yonse," byubilo ke biyukanyikwe.

116 Akyo kilengela Bahebelu 1:1, "Lesu wabimye byakala, waambile ku bashakulu kupichila mu bangauzhi," kasa amweshwa Kilishitu, wasanguka leelo, kupichila mu byubilo bimmo byonka Aye byo aubilepo mu bimye byakala. Bushe mwamona nyi? Lesu kechi ukinyaga mashinda Anji ne.

117 Mu Baibolo wakala, umvwe ulota biloto walota kiloto, kabiji kechi mwajingapo ngauzhi muntanda wakumona kana akye kiloto kyajinga kyaoloka nangwa ine, bajinga na jishinda jikwabo ja kuyukilamo. Basendanga awa muntu, yense walotele akya kiloto, bamutwajile ku tepo. Fukuta wa pakyaji wakwa Alona, wajinga ng'anga mukatampe, wa kukobekelwe pa kibumbulu. Kabiji awe kalota wabulang'ana kikye kiloto. Nangwatu kimwekanyike kuwama byepi, kimweke nobe kyakine; inge kechi kwamwekapo Kyeya kyabulume bwakukumya paoa mabwe ne, akyo kyatelwa mba Yulimu Tumimu (batanga Baibolo bakwatakanya); nanchi, Amiwa kechi natak muchima nangwa kyumvwanyike bulongo byepi, kechi byo kiji ne. Ngubilo ipya yakwa Lesa, byubilo byakwa Lesa, byamwesheshenga byubilo Byanji monka mubulume bwakukumya, mukumweshwa mba Aye wimweshwa Aye mwine mu mbila. Amena.

118 Amiwa naamba kintu kimotu bufuku buno. Awa Yulimu Tumimu wakala wapita, pakuuba Kyambo kyo kyoka kimweshwa byubilo bya Lesa, mulaye wakimye kyo twaikalamo. Kuji byubilo byakwa Lesa bimwekanyika kupichila mu mulaye wakimye kyo tubena kwikalamo.

119 Akyo kilengela Lesa kwikala umotu nobe byonka byo Ajinga. "Mu bimye byakala," talai, "mu bimye byapusanako, Aye waambile ku bashakulu kupichila mu bangauzhi." "Kabiji

mizhilo ne bangauzhi byajingako kufikatu ne ku kimye kyakwa Yoano; kufuma kukyokya kimye, Bufumu bwa Lesa.” Monai, “Pakuuba mu kino kimye kyapelako,” kwamba pa kintu kimo kyonka kyo Aubilepo, “kupichila mu Mwaana Wanji Yesu Kilishitu.” “Lesu, mu bimye byakala, mu misango yapusanako, waambile ku bashakulu kupichila mu bangauzhi; mu jino juba japelako,” kasa abena kubatu kintu kimo, “kwamba ku bantu (bashakulu) kupichila mu Mwaana Wanji Kilishitu Yesu.” Ye Asangula kufuma mubafu, kabiji Aye ubena kwikala mwiataeba, kasa abena kwimweshu Aye mwine ne kwitubuula bintu bikamweka kulutwe, amba Aye upimapima milanguluko ne kuyuka moyayila. Yesu Kilishitu ujitu pamo keesha, leelo, ne myaka yonse! “Lesu, mu bimye byakala ne misango yapusanapusana waambile kubashakulu kupichila mu bangauzhi, pakuuba mu ano moba apelako waamba kupichila mwi Yesu Kilishitu Mwaana Wanji.” Akye Kinembelo kechi kyakonsha kwalulwa ne. Kijitu byonkabya.

<sup>120</sup> Nobe byonka byo Naamba kunyuma, Lesu kechi ukeba muntu kulumbulula Kyambo kyanji ne. Aye ulumbulula Kyambo Kyanji Aye mwine. Inge Aye waamba kiji kyonse, kyubiwa, ako ko kulumbulula. Mwamona? Aye kechi ukeba muntu uji yense kwamba mba, “Kyawama, Naketekela kyalumbulula *kikye*.” Lesu wikimweshu kupichila mu kulumbulula Kwanji Aye mwine.

<sup>121</sup> Kuuba mba, inge mulaye waikala wa mujoja juba, kechi twakonsha kwikela ku kyeya kya—kya—kya kwa Luther ne, kechi twakonsha kwikala mu kyeya kyakwa Wesley ne, kechi twakonsha kwikala mu kyeya kya babo bonse ne. Twafwainwa kwikala mu Kyeya kyalailwa mujino juba.

<sup>122</sup> Byepi inge Mosesa waile ku Ijipita, ne kwamba mba, “Kyawama, tusa kushimika bwato bukatampe. Tukulupuka mukino kyaalo kwingijisha bwato. Awe Nailo usa kufika ne kuno”? Bafwajilwe kutala kunyuma mu mvungilo; kechi kujipo mulaye pa kyokyo ne. Abyo ibyo. Bino, mwamona, aye wimwesheshe ayemwine nobe ngauzhi wakwa Lesu, pakuuba mba kyo aambile kiye kifikizhiwe, pano abo bayukile mba wajunga na Kyambo kya Nkambo. Felo wajinga na mafumo, pakuuba Mosesa wajinga na Kyambo. Nanchi byo bafikile ku kalunga, mafumo onse atwelele pa kalunga; kabiji Mosesa waabwishe Isalela pa kalunga, pa mushiji wauma, mambo wajinga na Kyambo, kabiji wajinga Kyambo kya kyokya kimye. Mosesa wajinga Kyambo kyasololwa kya mu kyokya kimye.

Elaija wajinga Kyambo kyasololwa kya mu kyokya kimye.

<sup>123</sup> Kilishitu ke Kyambo kyasololwa, kabiji ne milaye yo Alaile. “Pakimye kicheche ba pano pantanda kechi bakamona Amiwa ne; pakuuba anweba mu kamona Ami, mambo Amiwa kekala ne anweba, ne mwi anweba, kufikatu ne kumpelo ya

pano pantanda. Mingilo yo Nyingila ne anweba mukeyuba.” Aye walaile bibye bintu. Kyokika? Ke byubilo bya Lesa bibena kumweshwa Kyambo Kyanji, byonka byo Aubile mu mankulo onse.

<sup>124</sup> Malakai 4, Waamba mba, “Aja juba jikatampe ja Yehoba jilengesha moyo kasa jikyangye kufika, talai, Amiwa nkemutumina Elaija ngauzhi; kabiji ukabwezha lwitabilo lwa baana ku bashabo ne jikwabo, aja juba kasa jikyangye kufika.” Aye wikilaile.

<sup>125</sup> Yesu waambile mba, mu kyapitala kyabu 17 kya mu Luka Wazhila, “Kabiji byonka byo kyajinga mu moba a Sodoma, byo byo kikekala ne pakwiya kwa Mwaana muntu, kimye Mwaana muntu po akasololwa.” Kimye lumwekesho po lukamweka, mu moba ntanda poikekala nobe Sodoma, kikekala byepi? Byubilo bya kyokya Kinembelo bikafikizhiwa. Lesa kwimweshwa Aye mwine kupichila mu byubilo Byanji, byubilo Aye byoekala nabyo kimye kyonse. Aye kechi wakonsha kuleka byobya ne.

<sup>126</sup> Mu moba akupelako, Aye wimweshwa kupichila mu Mwaana Wanji. Monai Lesa byo oba bibye bintu kimye kyonsetu. . . nobe Aye kimy- . . . Aye kechi ukingya jishinda Janji ne.

<sup>127</sup> Aabo bantu basatu besambilenga ne Abulahama, byo besambilenga popa, mu moba a Sodoma.

<sup>128</sup> Abulahama wajinga muntu waketekejile Lesa. Aye wasendele Lesa monka mwaila mulaye Wanji. Sala, mukazhanji, wajinga na myaka sikisite-faivi, Abulahama wajinga sebetefaivi, kimye Lesa kyo amwichile. Waambile mba bakekala na—na mwaana; Abulahama ukekala na mwaana mwi Sala. Kyakonsha kumvwanika nobe myendeleko, bino Naketekela wakebele tonse tu—tu kwabilo ne mapinyi, kabiji bintu byonse, byanengezhiwe, mambo bakekala na yuwe mwaana.

<sup>129</sup> Pakupitapo moba atanshi tweti-eiti, kika, Abulahama waambile kwi Sala mba, “Ubena kumvwa byepi, mutemwe?”

“Kechi pajipo lupusano ne.”

“Lukumo lwikale kwi Lesa, tukekala nanji, nangwa byonkabyo.”

“Wayuka byepi?”

“Lesa ye waambile.”

Mwaka umo wapichilepo. “Ubena kumvwa byepi, mutemwe?”

“Kechi pajipo lupusano ne.”

“Tukekala nanji, nangwa byonkabyo. Lesa ye waambile.”

Myaka faivi yapichile. “Ubena kumvwa byepi pano, mutemwe?”

“Kechi pajipo lupusano ne.”

“Tukekala nanji, nangwa byonkabyo. Lesa ye waambile.”

<sup>130</sup> Kyajinga kika? Wajinga na mulaye wakwa Lesa. Aye waketekejile Lesa, kabiji ngubilo yanji yajinga nobe yakwa Lesa: wakwachijiletu ku Kyambo kyalailwe. Kajinga . . .

<sup>131</sup> Myaka tweti-faiwi yapichile. Makwabilo aalukile ke kibobo, bino wiakwachijiletu. Pano aye ke mukote, kabiji mapuzhi akukulukile, kabiji mwekelo yanji yalubakeneko; kabiji munda mwaka Sala mwaumine, ne kubula kusema. Kabiji nga musango yebajingamo!

<sup>132</sup> “Ubena kumvwa byepi, Abulahama, shanji byaalo?” bakitabila-mbijinga balunda nanji baambilenga kwi aye.

<sup>133</sup> “Kyawama, lukumo lwikale kwi Lesa, Naumvwa bulongo. Tukekala na yewa mwaana, nangwa byonkabyo.” Mambo aye kechi witutwile mumulaye wakwa Lesa kupichila mu kubula lwitabilo ne; bino wajinga wakosa, kasa atakaika Lesa, mambo aye washinjilwe mba Lesa ye waamba, Lesa wakonsha kwikyuba. Amena. Abyo byo byubilo bya waitabila.

<sup>134</sup> Pano nga obewa? Mwamona? Pano nga atweba, baana bakwa Abulahama? Bushe twimwesa na Kyambo kya Lesa, nobe mulaye, kabiji byubilo byetu bitumwesa atweba bene, amba kine Twikitabila? Nangwa, tuseketu sekelo-yabaya, kukiluka kufuma *papo*, kabiji ne kuya *papo*, kabiji ne *papo*, ne kufwanyikizha, kabiji ne kuseka sekelo-yabaya konse konse, pa Kikye? Nishi, kechi twi Benakilishitu ne, tubena kubatu bukitabila mbijinga.

<sup>135</sup> Bino, umvwe kine twaimana payewa mulaye, kwimena kumana kabiji ne kwikala Nakyo! Abulahama wikyubile.

<sup>136</sup> Bino twatana kuuba mba, juba jimo wamwene bantu basatu kasa beya, na kwenda panshi. Aye Baibolo waamba mba, “Kyajinga mu kusama kwa juba,” kyafwaijilwe kwikala kimye kya kushikamana kwa juba. Abo bantu baendele kwiya koaji kabiji baambilenga nanji. Twayuka mba babiji baile ku Sodoma. Naketekela mba twaambilepo bufuku bukwabo. Umo wamwiabo waikele nanji.

<sup>137</sup> Monai yuwe Muntu ye atongwele mba . . . awa waikela nanji, kyaubile yewa Muntu. Umo wayukanyikilwe kupichila mu byubilo Byanji, mba Wajinga Elohimu.

<sup>138</sup> Elohimu, kyambo kitanshi kiji mu Baibolo, “Muntendekelo Lesa . . .” Bino, anweba bafunda mwayuka mba kyambo kyaamba mba *Lesa* papo kyalumbulula, mu Kihebelu, ke “Elohimu,” kyalumbulula mba, “aye Wabulume bonse, aye wafikilamo-yense, aye watanwako-pabuke bwanji,” kechi ukeba bukwasho kufuma ku muntu ne, kechi kikebewa muntu kwikilumbulula ne; Aye Mwine wikyuba. Aye ye Lesa wafikilamo-yense, utanwa konse konse, wayuka byonse, wabulume bonse. Aye ye Lesa.

139 Awa wajinga Iye. Kabiji Abulahama pano, awe mushakulu wajinga na Kyambo, watajile pa yuwe Mulunda. Kabiji awe Mulunda byo avundamujile nyuma Yanji ku tente, Waambile mba, “Mukazhi obe ujipi, Sala?”

Waambile mba, “Uji mutente, kunyuma Yenu.”

140 Waambile mba, “Amiwa nkakupepula mwaila kimye kya bumi, kabiji ukekala na yuwe mwaana ye Nakulaile.”

141 Kabiji Sala wasekele pa kikye. Kabiji Umo wisambilenga nanji, wamubuujiile byaambile Sala mu tente, kunyuma Yanji.

142 Bino, mu Ntendekelo, mwakonsha kutanga kyokyo. Twatana kuuba mba nanchi, Abulahama, panyuma ya yuwe Muntu wimweshwa Aye mwine . . .

143 Kyajinga kika? Bahebelu, kyapitala kyabu 4, na veeleshi wabu 12, waamba mba, “Akyo Kyambo kya Lesa kyatwisha, kyabulume kukila pa mpoko-yatwa kubiji, kipima pima milanguluko ne kulondalonda mwaila nkebelo ya muchima.”

144 Aye wayukile mba awe ke Muntu. Wayukile mba kechi kwajingapo bangauzhi mu ntanda ne kanatu aye, onkao mambo Kyambo kya Lesa kyaishile kwi aye. Kabiji aye wajinga ngauzhi, kabiji papo Kyambo kyaiya kwi ngauzhi.

145 Kintutu kimo ne Yoano Mubatishi. Kechi kwajingapo ngauzhi pa myaka foolo aduleendi ne. Navuluka . . .

146 Kapepo Dokotala Davis wakala waikala muno, bufuku buno, musapwishi wakala waku Missionary Baptist wambatizhe ami mu Lwitabilo. Aye bimye byavula wapachikanga ne amiwa. Aye waambile mba, “Billy, obewa ukijitu mwanyike. Wafwainwa kuteleka kwi amiwa.”

Naaambile mba, “Kijitu bulongo, Mulongo Davis, Mbena kuteleka.”

147 Waambile mba, “Mwamona, Yoano kechi wabatizhilwe ne. Nanchi aye wabatizhilenga, bino aye kechi wabatizhilwe ne; kechi kwajingapo wafikilamo ku mubatizha ne.” Ao ke sukuulu wa mambo awama wa ba Baptist. “Kabiji Yesu waishile, ne kwamba mba . . . Yoano waambile mba, ‘Amiwa nafwainwa kubatizhiwa kwi Anweba; pano kika kyo Mwaishila kwi amiwa?’ Kabiji waambile mba, ‘Swishai mba kikale byonkabyo.’” Waambile mba, “Kabiji byo a ‘muswile’ Aye,” waambile mba, “mwamona, nanchi Yesu wabatizhe Yoano. Kabiji byo Alupukile mu meema, nanchi meulu ashikukile ne Aye wamwene Lesa mu musango wa nkunda, kasa abena kwikila panshi ne kuya pe Aye, waambile mba, ‘Awe ye Mwana Wami ye natemwa, Monka Monamwena lusekelo kwikalamo.’” Bino, ine, kechi kupachika ne Dokotala Davis ne, bino wajinga na kilubo.

148 Monai, Yoano wajinga ngauzhi, kabiji Kyambo kimye kyonse kiiya ku ngauzhi. Nanchi umvwe Kyambo kyaalwilwe ke muntu, Kyafwaijilwe kwiya ku ngauzhi, nangwa byonkabyo; mambo,

aye wapainenga lushimuno lwa Kyambo, kabiji byonka byubilo byanji bya mumwesheshe byo byo. Ke kiiye Kyambo, pano kika kiamwekele? aku ufikatu ku meso akwa Yesu, Yoano waambile mba, “Nafwainwa kubatizhiwa kwi Anweba; pano kika Anweba kyakwishila kwi amiwa?”

<sup>149</sup> Yesu waambile mba, “Swai kikale byonkabyo, mambo kitufwainwa atweba (kyafikilamo) kufikizha bololoke bonse.” Yoano byo ajinga ngauzhi; Aye byo ajinga Kyambo. Aye wajinga Kitapisho, kabiji Aye wajinga pepi kutwela mu mwingilo wanji wa pantanda, kabiji Kitapisho kyafwayijilwe komvwewa kasa kikyangye kupanwa ne. Kabiji Yoano wa mubatizhe Aye, mambo wayukile. “Swai mba kikale byonkabyo, mambo kitufwainwa atweba kufikizha bololoke bonse.” Akya Kitapisho be kyomvwele kasa kikyangye kupanwa, nanchi Yoano wa mubatizhile Aye. Kechi wajinga Yesu wabatizhile Yoano ne. Yoano wabatizhile Yesu. “Swai mba kikale byonkabyo.”

<sup>150</sup> Monai, awe wajinga Abulahama, kabiji wajinga na Kyambo kya Nkambo. Aya Kyambo kya Nkambo kyaishile kwi aye. Aye wajinga ngauzhi. Kabiji pano Kyambo ke kiye. Aye wamutelele mba, “Abulahama,” kechi mba *Abulama*.

<sup>151</sup> Mobatu acheche kufuma popa, jizhina janji jajinga Abulama—Abulama, pano ke Abulahama. Mukazhi wanji wajinga Selai, pano ke “Sala,” kechi mba S-e-l-a ne; S-a-l-a. Kechi mba (A-b-u-l-a-h-a-m-a) A-b-u-l-a-m-a, kana mba A-b-u-l-a-h-a-m-a, Abulahama.

<sup>152</sup> Kabiji awe Muntu wimwesheshe Aye mwine, Aye byo aambile mba, “Abulahama!” Oo, ami!

Abulahama waambile mba, “Elohimu!”

<sup>153</sup> Apa pajinga Kyambo ne ngauzhi, bonse babiji, bonse byubilo byabo byamwekanyikile.

<sup>154</sup> Elohimu, Aye waambile mba, “Mukazhi obe uji kwepi, Sala?”

<sup>155</sup> Waambile mba, “Uji mutente, kunyuma Yenu.” Kabiji aye. . . Apa ponka kyakukumya kyaubiwe. Elohimu! Abulahama Wamutelele mba, “aye wafikilamo—mu byonse, Wabulume bonse, Lesa wa bulume bonse.”

<sup>156</sup> Yesu waambile mba, kimye kyo ajinga pano pantanda, Aye waubile kintu kimo kyonka kyaubilepo Elohimu. Akya kyamwesheshe byubilo Byanji kwikala Lesa.

<sup>157</sup> Kabiji Aye waambile mba, kasa bakyangye, “Mu moba akupelako, ponka pa kwiyatu kwa Mwaana wa muntu, kimye kyo Akesolola, aye ngubilo ikamweka ne jikwabo, byonka byo kyajinga mu Sodoma.” Elohimu mukachi ka bantu Banji, aye Lesa Wabulume bonse! Abye byo byaamba Kinembelo. Elohimu mukachi ka bantu!

158 Pa myaka foote Aye ubena kwitubatizha na Mupashi Wazhila, Elohimu, Lesa! Kabiji kipwilo . . .

159 Talai, Abulahama wamwene kiyukilo kimo, lwito lukwabo; kiyukilo kimo, lwito lumo; lwito lumo, kiyukilo kimo; na kupembelela mwaana walailwe. Pakuuba kiyukilo kyapeleleko kyo amwene, kumweka kwapeleleko, lupepu lwa Lesa lwapeleleko mulaye wa mwana kasa akyangye kufika ne, wajinga Elohimu mu mubiji. Apo mwaana walailwe poaishile.

160 Kabiji Lunkunwa wakwa Abulahama ubena kupembelela Mwaana walailwe, Yesu Kilishitu. Kabiji bamona biyukilo, kwitulwilwa kwa Mupashi Wazhila, kwamba mujimi, lubuko lwa Bulesa, ne bikwabotu. Pakuuba umvwe Mwaana wa muntu ubena kusololwa ne, Elohimu ukabwela jibiji ku Lukunwa wabufumu wakwa Abulahama ne kumwesa bintu bimo byonka byo Amwesheshe mujoja juba, amwena, Elohimu, byonka byo kyajinga! Kika? Kikekalatu byubilo bimo bya kwa Lesa.

161 Pano, inge Kilishitu wajinga Lesa, “Bino mu kakimye kacheche ne bapano pantanda kechi Bakamona ne; bino anweba Mukamona, mambo Amiwa kekala ne anweba, monka mwi anweba, kufikatu ne kumpelo, yo mpelesho. Mingilo yonguba Amiwa ne anweba mukeyuba.”

162 Yesu waambile kyokyo mu—mu Luka, kyapitala kyabu 17. Kijitu bulongo, inge twaitabila kabiji twamona ano moba ampelako, aye ngubilo ikamweka ne jikwabo.

163 Onkao mambo, Bahebelu 1:1, “Lesu, mubimye byakala wimwesheshe Aye mwine kupichila mu bangauzhi, mu ano moba apelako wamwesa lusanguko lwa Mwaana Wanji kufuma mubafu,” kupichila mu kupana ku Kipwilo byubilo bimotu byonka byo Ajinga nabyo, kulengela Bahebelu 13:8 kwikala wakine.

164 Kafwako mayona wafwainwa kuvuyula kufuma ku kyokyo ne. Ao ke mayona ampungu. Bekala bakosa, mambo ke bang’onyi ba mwiulu. [Paji kifita pa tepu—Waku.] . . . be bajisha kajo ka bampungu.

165 Pano twamona mba, “Mu bimye byakala, mwapusanapusana, Aye waambile ku bashakulu kupichila mu bangauzhi, pakuuba mu moba apelako kupichila mu Mwaana Wanji Yesu Kilishitu, ponka pa kumusanguka Aye kufuma mubafu.” Kabiji papo Aye uji mukachi ketu, pakupitapo myaka masauzande abiji, umotu yeka Yesu, kechi umo wa mubangazhi ne; Yesu, aleluya, wasanguka Mwaana wa Lesa!

166 Yesu waambile mba, juba jimo, Aye waambile mba, “Kisemi kyabubi ne kya bukende kikeba kiyukilo, kabiji bakekimona kiyukilo.” Kisemi kyabubi ne kya bukende. Kimye ka ntanda po yajinga yakilapo bubi, nangwa bukende kabiji ne kwalulula bintu, kwesakana pamo na kino kimye?



167 “Byonka byo kyajinga mu moba akwa Yona, byonka byajinga Yona munda ya jisabi pa moba ne mafuku asatu, nanchi byo kyafwainwa Mwaana muntu kwikala mu muchima wa ntanda moba ne mafuku asatu.”

168 Nanchi, “kisemi kyabubi ne kyabukende” kyajinga kya kutambula kiyukilo. Musango ka wakiyukilo? Kiyukilo kyalusanguko. Kabiji tuji nakyo ne leelo, panyuma yakupitapo myaka kiumbi kimo, Aye ukijitu mumi. Aye uji mukachi ketu, bufuku buno, ye umotu keesha, leelo, ne myaka yonse, kasa emweshwa Aye mwine kupichila mu byubilo byakwa Lesa, na kusolola Kyambo mu jino juba akya kyo alaile kuuba. Amena.

169 Kuji Kyambo. Pano mwakosha kuketekela kiyukilo nyi? kyo kintu kyalondelapo, moba akupelako, kwimweshwa Kwanji kupichila mu Mwaana Wanji. Monai.

170 Lesa waambile kwi Mosesa mu bimye byakala. Mu Mpitulukilo ya mizhilo 18:15, amba, “Aye Yehoba Lesa wenu ukemwimenya ngauzhi mukachi kenu uji nobe Amiwa.” Pano monai. Akye kyo Kyambo. Akye kyo Kyambo. Awa wajinga Lesa. Awa wajinga Mosesa. Nga Mosesa wakonsha kuyuka byepi? Aye wajinga muntu. Bino Lesa, kwamba kupichila mwi Mosesa, waambile kikye. Mwaketekela kikye nyi? Kijitu bulongo.

171 Pano monai Yesu, tajishai byajinga Byanji—Byanji byubilo byo byamwesheshe mba akye Kyambo kyakine. Aye kine wikyubile. Aye wayukanyikilwe kupichila mu byubilo byanji abyo Mosesa byo Aambile mba byoakooba.

172 Bavula mwi abo, nobe leelo, bakeba kumona umo ntangi mukatampe. “Oo, awe ye Dokotala Ph. *Kananga-ne-kananga*. Wafuma ku Hartford Univesiti.” Nangwa, “Aye wafuma kuntu kumo kukatampe nobe byobya.” Akya kechi kyo kiyukilo kyakwa Lesa ne. Ine, ine. Kechi pajipo kintu kimo pakikye ne. Akyo Kyambo kyo kimweshwa Lesa. Mwamona?

173 Yesu kechi wajinga wafunda ne, nangwa Aye kechi wajinga pulisiti ne, nangwa Aye kechi wajinga labbi ne, ku ntanda. Aye wajinga waluwakana ku ntanda.

174 Bino Lesa washinikishenga Kyambo Kyanji kupichila mwi Aye, kyamulengejile Aye kwikala Emanwele. Akya kyajinga kya kwimweshishamo Kyanji. Pano, papo, Yesu wafikizhizhe kyokya Lesa kyo aambile mu biye byakala Amba ukoba, kupichila mwi Mosesa, byo Afwainwa kuuba.

175 Pano monai byo Akumenye Petelo, byo twikyuba nobe kisela bufuku bumo, kimye kyo Akumenye Petelo kabiji wamubuula ne jizhina janji. Akye kiyukilo kya muyukishe bu Mesiyasa Bwanji, kwi Petelo, mambo Kyambo kyaambile mba, “Aye Yehoba Lesa wenu ukemanya Ngauzhi.”

176 Kabiji Petelo waishile, watelelwe mba Shimona pa kyokya kimye, waishile konka ko Ajinga. Kabiji Yesu wamutajile, ne

kwamba mba, “Jizhina jobe wi Shimona, kabiji wi mwaana Yona.” Akya kyamuyukishe byubilo bya Kilishitu kuuba mba ye kyokya Kyambo kyalaila Mosesa. Petelo watulukile mba akye kiyukilo kyasolwelenga Yesu amba ye Mesiyasa. “Lesu wajinga mwi Kilishitu,” kushingwa manyi kwa mu moba a kupeloko. Kwi Natanela . . . Vulukai, Aye wamubujile Shimona jizhina janji.

<sup>177</sup> Pano, monai, kwi Natanela Wamubujile ne byo aubile. “Obewa wajinga mushi ya kinchi kimye kyo Nakumwene.” Akya kyamusolwelenga mba Aye ye Mesiyasa.

<sup>178</sup> Waambile mba, “Anweba mwi Mwaana Lesu. Anweba mwi Mfumu wa Isalela.” Aye wayukanyikilwe kupichila mu byubilo bya Kyambo kyalailwe mba Aye ukekala Mesiyasa. “Aye Yehoba Lesu wenu ukemanya Ngauzhi.”

<sup>179</sup> Awa mwanamukazhi wamubiji muचेचे akwa ku mushima, Aye wamubuujile byo ajinga, kabiji akya Kyamumweshishe amba ye Mesiyasa. Mwamona?

<sup>180</sup> Byanji byubilo, Yanji ngubilo, yajinga Kyambo kibena kwisolola. Kyajinga ngubilo Yanji yamwesheshenga mba akya Kyambo ye Lesu, nanchi awa wajinga Lesu wimwesheshenga mwi Kilishitu. Pano kimonai. Talai.

<sup>181</sup> Kwi Petelo, Aye wayukanyikilwe kwi Petelo kupichila mu kumutela jizhina janji. Aye wayukanyikilwe kwi Natanela kupichila mukumubuula bintu byo aubile. Aye wayukanyikilwe ku mwanamukazhi, pa kumubuula musango ye ajingamo. Kika aye. . . *aye* byo ajinga; *aye* byo aubile; kabiji ne *Aye* byo ajinga. Aye wayukanyikilwe mu byubilo bya bu Mesiyasa Bwanji, abya byajinga byubilo bya bu Mesiyasa.

<sup>182</sup> Talai yewa mwanamukazhi wachepa mubiji waambile kintutu kimo. “Mwane, Nayuka mba Anweba mwi ngauzhi. Kechi twaikalapo na ngauzhi pa ma aduleendi a myaka yapitapo ne. Twaikala na byavula bya kipwilo, byavujisha bya myendeleo ne lupusano lwa bya madinominesheni, bino kechi twaikalapo na ngauzhi pa ma aduleendi a myaka yapita. Twayuka mba umvwe Mesiyasa waiya, abye byo bikalengela Aye kuyukanyikwa.”

<sup>183</sup> Aye waambile mba, “Amiwa yami Iye, ubena kwamba kwi obewa.” Kechi pajipo kyaluzhinauko pa kyokyo ne, “Amiwa yami Iye.” Akye kyamulengejile Aye kuyukanyikwa.

<sup>184</sup> Awa mwanamukazhi wajinga na lukatazho lwa kupita mashi, Aye wayukanyikilwe mu Kyambo. Byepi? Kupichila mu byo Aubile lwitabilo lwanji byo lwa Mukwachile. Aye waalulukile ne kwamba mba, “Ng’anyi wajikukwata Ami?” Aye wayukile mba kintu kimo kyamweka. Akye kya muyukishe Yesu amba Mesiyasa.

185 Aye wikiketekejile, kabiji waambile mba, “Inge Nakonsha kukwatatu ku kyakuvwala Kyanji, Amiwa nsakwikalatu bulongo.”

186 Nanchi ponkapotu byo amukwachile, Aye waalulukile, ne kwamba mba, “Pano ng’anyi wajikukwata Amiwa?” Kabiji bonse bakaine. Pakuuba byubilo Byanji bya bu Mesiyasa. . .

187 Amena! Naketekela anweba mwi kimona kyo, kipwilo. Telekai, byo tubena kushika.

188 Awa wa mukwachile Aye. Pajinga maaduleendi, kape, baesekelenga Kumukwata. Petelo wamulengulwile ne kumulengulula Aye, waambile mba, “Kyawama, bonsetu babena kukukwata Obewa.”

189 Waambile mba, “Ee, pakuuba umo Wajikukwata mwapusanako.” Alo lololwa lupusano, kwachilo ya lwitabilo. Mwamona? Waambile mba, “Muntu umo wajikukwata Amiwa. Yajinga kwachilo ingi. Naumvwa kukooka. Bulume bwafumamo mwi Amiwa. Bulume bwafumamo mwi Amiwa.” Bino, awa Waimana popa.

190 Pano, ne banababwanga Banji ke bambe, mu mulaka mukwabo, “Obewa ubena kumvwanyika—kumvwanyika nobe Obewa wi muntu wavulang’anako. Kika, bantu, bantu bonse babena kukukwata Obewa.”

191 Monai Yanji, monai kuyukanyikwa Kwanji pano. Aye waalulukile, watala mujibumba. Aye wamusobwelemo buke bwanji. Aye kechi watwajijile kufyama ne. Aye wamubuujile musango ye ajingamo, kabiji ne kumwambila mba, “Lwitabilo lobe lwakulengela kwikala bulongo.”

192 Aye wayukile, mukikye, kuuba mba, Bahebelu 4:12, “Akye Kyambo kiyuka milanguluko, ne kulondalonda mwaila muchima.” Byanji byubilo bimumwasha Aye kwikala “Kyambo kya Lesa kyaaluka ke muntu ne kwikala mukachi ketu.” Amena.

193 Naketekela mba kintutu kimo bufuku buno Aye kibena kumuyukisha, Yesu Kilishitu wasanguka ubena kwikala mukachi kentu bufuku buno, yenka umotu keesha, leelo, ne myaka yonse. Pano, byonka biji Bahebelu 13:8 wakine, byubilo Byanji bikamuyukisha Aye leelo, byonka byo kyaubile kyokya kimye, mu musangotu umo.

194 Monai kwi Kileopasa ne bakwabo, panyuma yakusanguka. Yesu wiyukishe Aye mwine mujishinda jo Atebwijilemo shinkwa, mambo Wikyubile mujishinda jonka jo Aubilangamo Aye kasa bakyangye kumupopa. Kabiji abo. . .Abya byamuyukishe byubilo Byanji, mambo aja jo jishinda Aye jo aubilangamo.

195 Pano inge Aye wajinga pano bufuku buno, wakonsha Kwimwasha byepi Aye mwine? Nobe byonka byo aubile keesha, mambo Aye ujitu pamo leelo, kabiji byobyoyo akekala myaka

yonse. Ke kya kwiyukilamo. Bahebelu 4, foo-...14 ne 15, "Aye byo aji ponkapano..." Kyaamba mba, "Aye ye Ng'anga Mukatampe wakonsha kukwatwa ku bya lumanamo byetu." Aye ye Ng'anga Mukatampe wetu ponkapano. Panyuma yalusinguko Lwanji, panyuma ya lufu Lwanji, panyuma ya kuzhikwa Kwanji, anyuma ya kusanguka Kwanji, panyuma ya kushikulwa Kwanji, amena, Aye ukijitu musango umotu keesha, leelo, ne myaka yonse, Ng'anga Mukatampe wakonsha kukwatwa ku byalumanamo byetu. Amena. Aye byo aji, ponkapano, ku muntu yense kabiji ne mwanamukazhi muno wakonsha kwikiketekela. Aye ye Ng'anga Mukatampe wetu, ujitu pamo keesha, leelo, ne myaka yonse.

<sup>196</sup> Aye uji na bumi. Mwikiswa kyo nyi? [Kipwilo kyaamba mba, "Amena."—Waku.] Byanji byubilo bitwajijilatu na kumuyukisha Aye pamotu nobe byonka byo Ajinga kimye kyo Aikalanga pano pantanda. Aye ukijitu na bumi muno, bufuku buno, mu musango wa Mupashi Wazhila. Aye uji na bumi kikupu. Kabiji byubilo Byanji Bimulondela, nobe byonka byo byaubanga kimye kyonse, inge Aye ukiji na bumi.

<sup>197</sup> Amiwa nasata, bufuku buno, amba, "Lesu, mu bimye byakala ne bimye byapusanapusana waambile kubashakulu kupichila mu bangauzhi, mu ano moba akupelako kupichila mu Mwaana Wanji Yesu Kilishitu."

<sup>198</sup> Ami, kechi Najikuyuka mba Naamba kimye kyabaya ne. Najikulubako amba kiji muyuwe musango. Amiwa mundekeleko mambo. Amiwa nakonsha...Nsakuleka.

Twayai tulombe.

<sup>199</sup> Taata wa Mwiulu, Lesu mukatampe walusa! Nkambo, Ami—Ami...kape Naamba kimye kyabaya. Nalomba, Lesu, inge byo Najikuuba, Anweba mundekeleko mambo. Bino, Nkambo, Amiwa kechi nakonsha kulomba lulekelo lwa mambo pa byo Naamba ne. Naambatu byonka Anweba byo mwaamba mu Kyambo Kyenu papo.

<sup>200</sup> Pano kyambo kimo nangwa bibiji kufuma kwi Anweba, Nkambo, kapepo muntu yense usa kwikimona bufuku buno. Bantu bacheche, bantu bakolwa basakubukwa inge bamona mba Anweba mukijitu wabaya Ng'anga Mukatampe. Nalomba, Nkambo, mu kimye kicheche kyalondelapo, pakuuba mba Anweba mulengele iye Mbila kwikala bumi jibiji mu bukishika. Ku kyo Naamba kupichila mu Kyambo, lekai byubilo Byenu bimumweshe Anweba mukachi ketu, bufuku buno, kuuba mba Anweba mujitu pamo keesha, leelo, ne myaka yonse, mambo mo mu Jizhina ja Yesu mo twalombela. Amena.

<sup>201</sup> Pano mu kakimyetu kacheche. Atweba, Na—Nakelwakotu pacheche, bino anweba mwakonsha nkuswisha kimye kyabayako kyakuuba mba twikaleko na mulaini mucheche nobe fifitiini, mamineti tweti? Inge mwakonsha, sutulaiko

maboko enu, ne kwamba mba, “Atweba. . .” Kijitu bulongo, nasata—ne musachila. Najikulaya kwi mulupula pa afu pasitinaini. Kyafikila kimye ponkapano; kwashala mamineti tweti kufikila. Nanchi inge mwakonsha kupatu pepi nobe mamineti teni, Amiwa nsakupelawizhako bukiji bukiji.

<sup>202</sup> Twayai tumone, ng’anyi bitupa bya milombelo byo baji kupana leelo? [Mulongo umo waamba mba, “O.”—Waku.] O? Kika, twatatwijile kwepi bufuku bukwabo, wanu, wanu? [“Naketekela mba kyajinga wanu.”] Ee, uu-uu.

<sup>203</sup> Kabiji nanchi atweba, bufuku bwapita, twajikuubatu. . . aye Mupashi Wazhila. . . Najikutelekanga leelo, kabiji pa kupitulukamo mu byaambiwe. Amo mazhina a ki French, Najinga. . . Aye Mupashi Wazhila; jishindatu jo Nakonsha kwikyubilamo, pambelaitu mumone.

<sup>204</sup> Monai, kimye kimo inge wamona kimwesho, kyafwainwa kwalululwa ne kupewa kilumbululo. Kyalumbululwa. Kimonwa, nobe byo mwakonsha—nobe byo mwakonsha kumona awa—awa mukoko, kyalumbululwa mba booya mwa mukoko. Monai, mwafwainwa kwikala na kilumbululo kyakyo, monai, kabiji akya kimwesho kizhalululai ne kwi kilumbulula.

<sup>205</sup> Kabiji Najikumona bufuku bwapita, Amiwa—Amiwa najikukakalwa kutongola aa mazhina aki French, Najikusopelelangatu.

<sup>206</sup> Mu Africa ne kuji booba ma Hottentots ne bantushi, kabiji ne bintu bikwabo, Kyafwainwa kusopelelatu mazhina abo, ne kwibabuula byobaji, kwi kisopelelatu mu kitundu kyabo. Abo, bakonsha kuyuka byokiji, inge wikisopelelatu. Bino, monai, pakuuba Aye wayuka mitundu yonse. Aye ye Lesa wa Peenape.

<sup>207</sup> Twayai bufuku buno tutapile kufuma pa, twambe mba, sebete-faivi, kufika ku aduleendi, mu O. Ke O, bushe ibyo byo ajikwamba nyi? Amiwa. . . [Mulongo umo waamba mba, “Ee. O.”—Waku.] O, O. Ee. Kijitu bulongo. Ng’anyi uji na kitupa kya milombelo sebete faivi, twayai twikimone? Mu O, kitupa kya milombelo O, sebete-faivi, sutula kuboko kobe, yense uji nakyo. O’s. Kijitu bulongo. Iyai *kuno*. Sebete-faivi, eite, eite-faivi, naite, naite-faivi, aduleendi, pichilai *kukwe* inge mwakonsha. Kijitu bulongo, kiji, tantaminai kukwe, bukiji bukiji, mambo kechi tuji na kimye ne. Amiwa naketekela mba anweba musa kwikyuba.

<sup>208</sup> Talai pa kitupa kyenu kya milombelo. Talai pa kitupa kya bomwaikala nabo. Kika. . . Kabiji inge muntu umo walemana, baletai mu mulaini wa milombelo. Nanchi inge baji na O, nobe O, sebete- . . .

<sup>209</sup> Sebete-faivi kufika ku aduleendi, tantaminai *kukwe*, inge mwakonsha. Konse komuji, peulu, konse ko muji, iyai kuno, kabiji iyai ku mulaini bukiji bukiji, inge mwakonsha, pakuba mba tulameko kimye.

210 Pano anweba bashalapo muno, abo babula kwikala na kitupa kyamilombelo, sutulaiko kuboko kwenu ne kwamba mba, “Amiwa kechi jipo na kitupa kya milombelo ne, Mulongo Branham, bino Naketekela”? Sutulaiko maboko enu.

211 Bino vulukai, Amiwa nsakwamba kwi anweba pa Ng’anga Mukatampe. “Aye ye Ng’anga Mukatampe wakonsha kukwatwa ku bya lumanamo byetu.” Aye ye *Jehovah-Jireh*, “kitapisho kyanengezhiwa ne Yehoba.” Aye ye *Jehovah-Rapha*, “Yehoba ye witubuka ku bikola byetu byonse.” Mwaketekela kyokyo nyi? [Kipwilo kyaamba mba, “Amena.”—Waku.] Aye ye *Jehovah-Manasseh*. Ye *Jikebo*, ye *kisolelo*, *mutende* wetu, Aye ukijitu byonkabya. Kyawama, baanga baketekela mba onse o mazhina abukuzhi bwa kwa Yehoba aingijile ne kwi Yesu? [“Amena.”] Kine, Aye wafwainwa kwikala. Inge Aye—inge Aye... Kika, kechi byakonsha kwabenamo ne, nanchi Aye wajinga onse aa. Kabiji inge Aye ukiji *Jehovah-Jireh*, Aye ye *Jehovah-Rapha*. Inge Aye ye *Jehovah-Jireh*. . . Aye ye *Jehovah-Jireh*, ye “kitapisho kyalupulukilo kyanengezha Yehoba,” nanchi Aye ye *Jehovah-Rapha* ao “ubuka bikola byetu byonse.” Amena. Lubuko lwakonsha kwiyatu ne Lesa.

212 Kijitu bulongo, kimye bantu kyo babena katatama; Amiwa kechi jipo na kimye kyakumona kana bo bang’anyi nangwa musango ye bajimo ne. Pukuuba pano, bonse kokwa bayuka mba Amiwa kechi ne muyuka ne, sutulai maboko enu, ne kwamba mba, “Amiwa mbena kukeba Lesa. Bino kechi wanyuka ami ne, Mulongo Branham, bino Amiwa mbena kukeba Lesa. Amiwa nsakusutulatu kuboko kwami.”

213 Pano inge mwakonsha kuzhindamatu pa mamineti acheche, talai, ikalai bateshako muchima, zhindamaitu zoo. Bino Amiwa kechi nalumbulula kuuba mba, inge Naamba mba, “zhindamaitu zoo,” . . . Inge Nkambo wauba kintu kiji kyonse, anweba mwakeba kutakaika Nkambo; abo ke bupompweshi. Pakuuba kyo Nalumbulula ke kino, “kwendaukatu, mwaimana,” mwayukatu, akyo kechi kiji na mwingilo ne. Mwamona? Kabiji aye Mupashi Wazhila wikala wabula kukasuluka, wabula kukasuluka. Mwamona? Kintu kyonse kiji byoabyo, amiwa nshalatu, kabiji Ntatulatu kulwisha, jibiji, monai. Bino inge mwakonsha kuteleka!

214 Anweba mwavuluka mulaye Wanji mutanshi nyi? “Leka bantu bakuketekele, kabiji waikala wakishika, kafwako nangwa kimo kikemana ku milombelo yobe ne.” Anweba mwavuluka kyokyo nyi? [Kipwilo kyaamba mba, “Amena.”—Waku.] Abyo ibyo. Kabiji akyo ke . . . Amiwa kechi ne kimonapo kyakakalwa ne, kabiji kechi ki kakakalwa ne. Mambo Lesa.

215 Pano tusakupelawizha na mulaini wa milombelo, pakuuba mba tupite pa bavula inge kyakonsheka, na mambo akuvula bantu. Pakuuba anweba muji na bitupa bya milombelo kabiji

kechi mwaitwa bufuku buno ne, kwachijilaitu kitupa kyenu, tusakufika pe anweba. Kijitu bulongo.

<sup>216</sup> Pano anweba muji koko kwakubula bitupa bya milombelo, vulukai. Nangwa, anweba muji momo, nangwa muji na kitupa kya milombelo nangwa ine, ketekelaitu amba Aye uji nobe Bahebelu kyapitala kyabu 4 papo. “Aye ye Nga’anga Mukatampe wakonsha kukwatwa ku byalumanamo byetu.” Monai kana Aye ukijitu. . . Monai Yehoba inge wimweshwa Aye mwine mukachi ka bantu Banji, nobe byonka byo Aubile mu moba amu Sodoma. Kijitu bulongo.

<sup>217</sup> Kijitu bulongo, mwane. Pano twayai tulombe, pano, panai munema. Bino vulukai, Kyambo kimo kyafuma kwi Lesa kyakila byakonsha kwamba muntu uji yense. Pano, awe mwanamulume papo, Ami—Ami kechi namuyuka ne. Kabiji Nafwanyikizha mba aye uji. . . Obewa wi mwenyi kwi amiwa, byo uji nyi, mwane? [Mulongo waamba mba, “Ee.”—Waku.] Obewa wi mwenyi. Twayuka kintu kimo, amba atweba bonse tukemana ku Kyeenyi kya Lesa juba jimo; nobe muntu, twafwainwa ku kumana Kokwa. Akye kyo kimye kyetu kitanshi kya kusambakana.

<sup>218</sup> Pano inge waiya kuno, inge wakolwa, Amiwa kechi nayuka ne; kyakonsha kwikala kintutu kikwabo, mwamona. Pakuuba inge Na—inge Nabika maboko pe obewa, waamba mba, “Jitotwe ja Nkambo! Yanga, wikale bulongo.” Akyo kijitu bulongo. Wakonsha kuketekela kyokyo. Pano byepi umvwe Aye wakubuula kyatamako kwi obewa? Pano, monai, akyo kyapusanako, pano anweba mwayuka amba akya kimweshwa byubilo Byanji. Monai, akyo kuuba kyaikala byubilo byami ne. Amiwa ne muntu; Amiwa kuuba nayukapo kintu nangwa kimo pe aye ne. Amiwa naji kumubuulatu mba, “Amiwa kechi nakuyuka ne.” Aye kechi wanguka ne. Pano akyo kyakonsha kuuba byepi? Akyo kyakonsha kumweshwa byubilo bya kwa Yesu Kilishitu kwikala umotu keesha, leelo, ne myaka yonse. Byo twayuka mba akyo kechi kyakonsha kwikala amiwa ne, kechi kyakonsha kwikala ami ne, mambo Amiwa kechi na muyuka awe muntu ne. Amiwa nsakusutula kuboko kwami; *akye* kyo Kyambo. Mwamona? Amiwa kechi na muyuka ne. Ne aye kechi wanguka ne. Pakuuba byubilo bya kwa Yesu Kilishitu. . .

<sup>219</sup> Inge Yesu wajikwimana papo, kabiji aye, kasa akolwa, inge wakonsha kwamba mba, “Nkambo Yesu, mbukai,” nga Yesu wakonsha kumwambila mbaka? “Amiwa ne kyuba kala.” Abyo ibyo nyi? [Kipwilo kyaamba mba, “Amena.”—Waku.]

<sup>220</sup> “Aye wafumpilwe na mambo a mizhilulwila yetu; kabiji mo mu bipumo Byanji mo twabukilwa.” Bukuzhi bonse bo twakonsha kwikala nabo bwapwile pa Kalvali. Kufumatu popa, ke lwitabilotu, kwitabila mwingilo wapwila jimo. Abyo ibyo nyi? [Kipwilo kyaamba mba, “Amena.”—Waku.] Kijitu bulongo.

221 Pano, pano inge Yesu mumi, kabiji ne Amiwa naamba pa Kyambo Kyanji. . . .Abyo byo kiji, ke kubwelatu mu kwikepesha ne lwitabilo, kwitabilatu Kyambo Kyanji. Byo Akumenye bobwa bufuku, Aye waambile mba, “Kikafikizhiwa mba ukayuka ne byafyamika bya mu michima yabo. Abo kechi bakaketekela akya kiyukilo kitanshi kya ku kuboko ne, bakaketekela kikye.” Mwamona? “Inge babula kuuba kyokyo, nanchi mashi po akafinga ntanda.”

222 Byonka byo kyaubilwe mu kimye kya kwa Mosesa. Waambile mba, “Inge kechi bakaketekela abya biyukilo bibiji ne, apa ukechile mashi panshi,” monai, “ukechile meema panshi, akaluka ke mashi.”

223 Pano mu kutana kuuba mba, inge Nakonsha kumona lukatazho lobe byo luji, akyo kyakonsha ku kushinina ne ku kulengela obewa kwitabila, kuuba kyaikala byobyo nenyi? [Aye mulongo waamba mba, “Kine.”—Waku.] Mwayukatu kyafwainwa kwikala byubilo bya yewa Muntu ye Mbena kwambapo, Yesu Kilishitu.

224 Awe muntu, byo Najikumutala, wajikubwela panyuma. Uji na kivule. Kechi kujipo muchi kyo akonsha kukwasha yuwe muntu ne. Uji mu musango waktwalwa kulufu. Abyo ibyo. Aye bamutumbwile, kabiji akwa kutumbula kwajinga kwa bibese bya lusemo. Kabiji ke kaasa, ne yuwe kaasa wakumbana konse konse. Inge abyo ibyo, sutula kuboko kobe. Yenkatu Lesa ye wakonsha ku mubuka. [Aye mulongo waamba mba, “Aleluya! Aleluta! Aleluya!”—Waku.] Bino, tala, Nakeba kwambapo kintu kimo kwi obewa, mwane. Aye diabola kape wafyamine ku mupenyi wakwa dokotala, pakuuba kechi wakonsha kufyama kwi Lesa ne. Waketekela kyokyo nyi? Wikiketekela nyi? [“Oo! Oo!”] Nanchi Nalomba, mba, mu Jizhina ja Yesu Kilishitu, lekai akye kintu kimufume, lekai yuwe muntu ekale. Kafwapo kintu ne; waumvwatu kukooka. Kijitu bulongo.

225 Obewa ne Amiwa twi benyi umo kumukwabo, mwanamulume ne mwanamukazhi basambakana. Bino, nobe muntu, Amiwa kechi nakuyuka ne. Kabiji kapepo, nobe mwanamukazhi, kechi wangyuka ne; kechi kukila pa kuyukatu jizhina jami ne, nangwa kipikichala kyami, nangwa kintu kimo kya muyeo musango. Bino kechi twiyuka umo ne mukwabo ne. Abyo byo byubilo byetu. Kechi twayuka byubilo bya mukwabo ne. Pakuuba byubilo byakwa Kilishitu, Aye ye Kyambo, kabiji Kyambo kyalailwa mu jino juba. Mwajikung’umvwa amiwa kwambapo pakikye. Nanchi byubilo Byanji bisakumumweshwa Aye muno. Kechi ami kumuyukisha Aye ne. Amiwa kechi nakuyuka ne. Mwaumvwa. Kyetu—kyetu kipwilo kumvwa kyokyo nyi? [Kipwilo kyaamba mba, “Amena.”—Waku.] Mwamona? Amiwa—Amiwa ne muntu. Amiwa ne mulongo wenutu.



226 Nobe mwanamukazhi ku mushima, waambile mba kintu kimo kyatama, kintu kimo kyatama ku lubaji lobe, nangwa kyo ubena kukeba, nangwa kyo waishila kuno. Lekaitu Lesa ekale ke mutonyi pa kyokyo. Obewa ubena kumanyikwa ku musango wakubulwa mashi. Abyo ibyo, kechi ibyo nenyi? [Aye nyenga waamba mba, “Ee.”—Waku.]

227 Amiwa—Amiwa kimye kyonse ng’amba pa kyokyo, muntu umo ubena kulanguluka mba Nafwanyikizhatu. Amiwa kechi nafwanyikizhatu kyokyo ne. Ine. Bimye bimo, Ng’umvwa kyokyo, muntu umo. Kechi mwakonsha kufya milanguluko yenu pano. Pano paji nobe, Nayuka, muji babiji bakajimbulushi baikala muno. Mwamona? Nanchi pano vulukai Nakonsha kutongola jizhina jobe, ne apo, Lesa wakonsha, nanchi leka kulanguluka byobyoyo. Lekai ne mumweshe.

228 Tala kuno, inetu. Ntale. Amiwa kechi nayuka Aye byo akubujile ne, bino Na—Na muyuka byo Aji. Kabiji abyoyo byo byubilo Byanji bibena kwimweshwa. Ee, ke kubulwa kwa mashi mu mubiji, mashi, meema.

229 Bino, papo, pajipo kintu kimo. Monai inge babena kulanguluka mba akwe ke kufwanyikizhatu. Uji na mwaana ye ubena kulombelela, uji muno. [Nyenga waamba mba, “Ee.”—Waku.] Abyo ibyo. Uji na, pa kikolomeno kyanji, [“Ee.”], mifumba, kuvimba mukachi kamyona. Kibena kutwalwa na kutumbulwa. Kechi ibyo nenyi? [“Ee.”] Tolai koka katambala ne kwi kabika pe aye, kabiji mwitabile. [“Ee.”] Kechi muzhinauke ne. Kechi ukakebewa ku mutumbula ne. Pano ketekelaitu na muchima wenu yense.

230 Muji byepi? Kine kintu ke kino, mambo ayuwe mwanamukazhi kuno, uji na moyo wa kintu kimo. Uji na moyo na mukovu wa kisemwa ao waaluka ke kaasa. Uu-uu, uu-uu. Pano yanga, kasa waketekela, kabiji kechi kikekala muyeo musango ne. Yangatu, kasa waketekela mu muchima obe. Byubilo, kechi byami ne; ke Byanji!

231 Pano mwaketekela nyi? [Kipwilo kyaamba mba, “Amena.”—Waku.] Akye kyakonsha kulengela muntu yense kuketekela. [“Amena!”]

232 Bino, Amiwa kechi nakuyuka ne. Amiwa ne mwenyi kwi obewa. Lesa wakuyuka obewa. Mwaketekela kyokyo nyi...? Anweba mwayuka mba Amiwa kechi ne muyuka ne, kabiji ne anweba mwayuka mba kechi mwangyuka ne, nanchi mwaketekela mba awe Mupashi ubena kwamba kechi wakonsha kwikala mupashi wami ne? Mambo, ami, nobe muntu, kechi Nakuyuka ne. Pakuuba byubilo bya Kyambo kyalailwe kyo Kyambo kyatwisha kukila mapoko atwa kabiji, kabiji kiyuka milanguluko ne kulondalonda mwaila muchima.

233 Obewa wamolwa bingi. Wajinga na lukatazho lwa banabakazhi, lwajinga munda, kabiji amwa munda mwajinga

kaasa. Kabiji waile na kutambulako bukwashe, kyajinga bukwashe bwa kunsoka na mujilo wa malaichi, kabiji kintu kyaubiwe ke kuuba mba bapalang'enyetu mwaya mubiji. Kabiji wakonsha—wakonsha kufwa inge Lesa kechi wakonsha ku kubuka ne. Akyo kyakine. Mwaketekela pano amba usa kwi mubuka nyi? [Nyenga waamba mba, "Ee."—Waku.] Lekai Lesa wa Mwiulu a mukajipile awa diabola wafyama kwi badokotala. ["Oo!"] Aye wafyamine ku yewa mujilo wamalaichi, bino kechi ku Mupashi Wazhila ne. Yanga, umuketekele Aye, ponkapano, nyenga. Kechi muzhinauke nangwa pachechetu ne, poso kwitabila.

<sup>234</sup> Anweba mwaketekela mba Lesa wakonsha kubuka awa musango wa asima, ne kwi mukosesha nyi? [Mulongo waamba mba, "Ee."—Waku.] Anweba mwikiketekela nyi? Pano yanga mujishinda jobe, na lusekelo, na kwamba mba, "Nemusachila Anweba, Nkambo. Naketekela mba asima wami waubiwa."

<sup>235</sup> Muji byepi? Muji na lubazhibazhi. Mwaikala mu lubazhibzhi pa kimye kyabaya bingi. Monkamo, kyalengela kwikala na bilonda munda mobe, kimulengela anweba—anweba kwikala na lukatazho lwa munda. Kabiji mubena kukeba... Mubena kukeba kuja kajo kenu ka mulajilo nyi? Mwakonsha kuuba kyo Nsakwimubula mba mube? Yainga, kajai, mu Jizhina ja Nkambo Yesu.

<sup>236</sup> Mwaketekela na muchima wenu yense nyi? [Nyenga waamba mba, "Naswa."—Waku.] Wi inetu mwanjike uji nabulume, wamweka kwikala byobyo. Waketekela mba amiwa ne kalume Wanji nyi? ["Amena."] Waketekela mba byubilo Byanji byakonsha kwikala muno, mukuuba... Kyambo, Akyo kine, kabiji ne mulaye wa jino juba, "Mingilo Yonguba ne anweba mu keyuba"? ["Amena."] Amiwa kechi nakonsha kubuka ne. Aye wikyuba kala; bino byubilo Byanji bimumweshwa Aye, wakonsha kubuulang'ana kyatamako kwi anweba. Anweba muji na lukatazho lwa bainetu, lukatazho lwa banabakazhi. ["Ee, mwane."] Mwaketekela mba Lesa wikubuka ponka pano nyi? ["Ee. Amena."] Yanga mujishinda jobe, kechi kikakukatazhapo jibiji ne. Ketekelaitu na muchima wenu yense.

<sup>237</sup> Mwaketekela mba ami ne kalume Wanji nyi? [Nyenga waamba mba, "Ee, mwane."—Waku.] Inge Lesa wambula lukatazho lwenu byo luji, mwakonsha kuketekela mba byo byubilo byakwa Yesu Kilishitu nyi? Kiji mu nyuma yobe. Kechi kisa kutwajijila ne. Yanga, ketekela na muchima wenu yense. Ketekelai.

<sup>238</sup> Iyai, inetu. Ne anweba muji na lukatazho lwa munda. Ketekelai na muchima wenu yense, kabiji yainga mukaje kajo kenu ka mulajilo. Kilubaikotu. Yesu Kilishitu wi mukosesha.

<sup>239</sup> Iyai. Lukatazho lwenu ke mashi enu. Muji na kikola kya shunga. Mwaketekela mba Lesa usa kwimukosesha kabiji ne

kwi mubuka nyi? Yainga mu jishinda jenu, ne kwamba mba, “Nemusachila Anweba, Nkambo Yesu,” wi mukosesha. Yainga, ketekelai na muchima wenu yense.

<sup>240</sup> Iyai. Nyuma yenu, mwaketekela mba Lesa usa kubuka nyuma yenu kabiji ne kwimukosesha nyi? Yainga mujishida jenu, na kusangalala, kabiji ne kwamba mba, “Nemusachila Anweba, Nkambo Yesu.”

<sup>241</sup> Ne obewa wajinga kintu kimo kyatama na nyuma yobe. Twajijilaitu na kwenda, ne kwamba mba, “Nemusachila Anweba, Nkambo. Amiwa na bukwa.” Kiketekelai na muchima wenu yense.

<sup>242</sup> Ne anweba muji na lukatazho lwa nyuma. Mwayukapo ka pa kyokyo? Ketekelai na muchima wenu yense pano, kabiji yainga kwenu kasa mwakosa. Ketekelai Yesu Kilishitu mba wimukosesha. “Inge mwakonsha ku ketekela, bintu byonse byakonsheka.” Kijitu bulongo.

<sup>243</sup> Ibyepi inge Nabula kwambapo kyambo kwi anweba, mwapitatu na bikapo maboko pe aye, mwaketekela mba usa kwikalatu bulongo nyi? Abo bamona kyatamako. Mwaketekela mba aye usa kuuba nyi? Iyai kuno. Namubwezha awe diabola, mu Jizhina ja Yesu Kilishitu. Lekai bulume bwa Lesa bubuke yuwe mwanziye. Amena. Kechi muzhinauke ne, kechi muzhinauke nangwa pachechetu ne, kabiji usa kwikalatu bulongo. Ketekelaitu na muchima wenu yense.

<sup>244</sup> Inge Lesa wabula kukubuka, ukekala kilema pa mibanda juba jimo, na kikola kya mashimba. Bino mwaketekela mba Lesa usa kubuka mashimba obe nyi? Nanchi yanga, na kwamba mba, “Nemusachila Anweba, Nkambo. Amiwa ne muketekela Anweba, kabiji Anweba mukoseshe.” Kijitu bulongo.

<sup>245</sup> Iyai pano. Ke kimino kyenu. Anweba muji bingi na lubazhibazhi. Mwikala bingi na lubazhibazhi, mu kimye kya bufuku. Inge mwaingila kabiji ne bintutu bikwabo, mwikala bingi na lubazhibazhi. Anweba mwaketekela pano? Kechi kikemukatazhapo jibiji ne. Yanga mujishinda jobe, na kwamba mba, “Nemusachila Anweba, Nkambo Yesu.”

<sup>246</sup> Iyai, mwane. Mwaketekela mba Lesa ubuka lukatazho lwa muchima? [Mulongo waamba mba, “Ee.”—Waku.] Usa kwimulengela muchima wenu kwikalatu bulongo nyi? Twajijilaitu nakuya kulutwe, kasa mwamba mba, “Nemusachila Anweba, Nkambo. Naketekela na muchima wami yense.”

<sup>247</sup> Lesa ubuka TB, ne kwimulengela kwikala bulongo, ne apo. Mwaketekela kyokyo, mwane, na muchima wenu yense nyi? [Mulongo waamba mba, “Nekiketekela.”—Waku.] Kijitu bulongo. Yainga mujishinda jenu kasa musangala, ne kwamba mba, “Nemusachila Anweba, Nkambo Yesu.”

248 Pano nga anweba koko, mwaketekela nyi? Pano nga jibumba? Bamo mwi anweba mu jibumba pano mwaketekela.

249 Awe mwanamulume uji papo, na kikola kya kushika mukyaji, mwaketekela mba Lesa wakonsha kubuka kikola kya kushika mu kyaji? Kijitu bulongo, mwakonsha kutambula kyo mwaipuzha, nanchi. Amena.

250 Kikola kya kwenda mashi lubilo, anweba mwaikala kunyuma ya yuwe koko. Mwaketekela mba Lesa wakonsha kubuka kikola kyakwenda mashi lubilo nyi? Kyafuma pe anweba, mwane. Amiwa kechi namuyuka ne, kechi na mumonapo mu bumi bwami ne.


251 Naamba mba, mwane, mwaketekela mba kwendauka kwa misunyu yenu, lubazhibazhi lwa kwenda kwa misunyi, mwaketekela mba Lesa usakwimulengela kwikalatu bulongo nyi? Mwaswa nyi? Sutulaiko maboko enu inge mwaketekela. Kijitu bulongo.

252 Bakazhi benu baikala popo, bakatazhiwa na lukatazho lwakupita mashi. Mwaketekela mba kyafumapo pe anweba nyi, ne anweba, nyenga?

253 Awa inetu waikala kunyuma yetu kukwe, uji na kikola kya kukola mishipeshipe. Mwaketekela mba Lesa wakonsha kubuka kikola kyenu nyi, inetu?

254 Papo paji inetu uji na kakochi kakacheche, kochi uchila, papo. Aye waikala popa. Uji na lukatazho lwakupita mashi, ne aye. Mwaketekela mba Lesa wakonsha kwi mubuka ku kikola kyenu nyi? Sutulaiko kuboko kwenu, inge mwikitabila.

255 Uji yense muno waketekela mba byubilo bya Yesu Kilishitu biji mukachi ketu, bufuku buno, sutulaiko kuboko kwenu, ne kwamba mba, "Nekiketekela." [Kipwilo kyangalala ne kwamba mba, "Nekiketekela!"—Waku.]

256 Bonse baji muno, inge mwakonsha kumuswa Aye kwikala lubuko lwenu, imanaiko, ne kwamba mba, "Nekiketekela." Imanaiko. Imanai, kufuma mu bipona byenu, ne kyonse byo kiji. Yesu Kilishitu ujitu pamo keesha, leelo, ne myaka yonse. Amiwa nekipea kwi anweba, Mujizhina ja Nkambo Lesa. 

*LESA KWIMWESHA AYE MWINE*  
*KUPICHILA MUBYUBILO BYANJI KDE64-0320*  
(God Identifying Himself By His Characteristics)

Ino Mbila na Mulongo William Marrion Branham, yalupwilwe patanshi mu Kizungu pa Kitanu mabaanga, Mulombola 20, 1964, Denham Springs High School mu Denham Springs, Louisiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2021 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)